



**Memba bilong Saut Flai, Aide Ganasi i dai - P6**

**Ol palamen poto long p8**



**31 i greduet long NRI trening kos - P14**



**Nambawan Meri Jas i dai - P10**

# Oposisen laik kisim baset go long kot

**OPOSISEN i laik kisim gavman i go long kot bikos ol i no wanbel long wei Gavman i yusim namba long pasim 2017 Nesanel Baset.**

Oposisen i tok gavman i yusim namba bilong em long pasim baset taim ol namba bilong baset i no stap stret.

Oposisen i tok Aproprisen Bil bilong 2017 Nesanel Baset i tok total mani bilong yusim long neks yia em i 'K21 bilien' taim ol baset pepa i tok total mani em K12.9 bilien.

Oposisen lida Don Polye i bin kisim ol memba bilong Oposisen i go aut long Palamen long Tunde apinun taim ol i painimaut olsem dispela tupela namba i paul go kam na i no stret.

"Mipela bai kisim dispela i go long kot na stopim gavman long bihainim dispela mani plen bikos namba bilong mani i no stret," Mista Polye i tok.

Praim Minista Peter O'Neill i tok no gat wanpela asua i stap long dispela baset pepa na Aproprisen Bil.

Mista O'Neill i tok Oposisen i save painim toktok long sutim tok i go long Gavman, na em i tok dispela kain pasin i mas stop.

"Mani mak bilong Nesanel Baset i stap pinis long pepa. Em i K13 bilien. Oposisen i toktok long wanem samting," Mista O'Neill i tok.

Em i tok Palamen i sori long dai bilong Deputi Palamen Spika Aide Ganasi, na ol i pasim dispela baset long Tunde apinun bihain long Memba bilong Saut Flai i dai long moning.

Pastaim Atoni Jeneral, Kerenga

Kua, i tok i no gat wanpela bil i bin stap long plua bilong Palamen bikos ol namba bilong baset i no bin stap stret.

Mista Kua i tok Gavman i mekim wanpela bikpela paul pilai na giamanim ol pipel.

Tresera Patrick Pruaitch i bin tokaut long K12.9 bilien Nesanel Baset long las wik Tunde.

Planti ol gavman dipatmen na ejensi bai no inap kisim bikpela mani olsem ol i bin kisim long las yia na bipo long las yia.

Mista Pruaitch i bin tok wanpela as bilong mani mak bilong baset i pundaun em bikos prais bilong ol komoditi olsem gol, kopa, nikel, ges, na oil i pundaun long wol maket.

## Trump i kamap Presiden bilong Amerika



Frieda Sila Kana i raitim

BIHAIN long strongpela resis bilong sia bilong Presiden bilong strongpela pawa kantri long Wol, Yunaitet Stets bilong Amerika (USA), i tokaut olsem ol i laikim nupela kain lidasip long kisim ol i go insait long nupela taim long wol ikononi, olsem na ol i makim Donald Trump long kamap namba 45 presiden bilong ol. Donald Trump, wanpela bikpela bisnis man bilong Amerika, namba wan taim i kamap politisen na winim Amerika ileksen wantaim 268 pesen vot winim Hillary Clinton, pastaim Seketeri bilong US, husat i kisim 215 pesen vot tasol.

Moa stori long pes 7...



**Wasa Rice 200g**  
**Em Skel Ya**



**GROWN FOR THE PEOPLE OF PNG**



**PALAMEN  
NIUS**

# Gavana Jeneral sori long dai bilong Jas na Depti Spika

## Gavman go pas long daunim klaimet senis

MINISTA bilong En-vauiromen na Konsevesen, John Pundari, i tok PNG i wok long go pas long mekim ol bikpela wok long Klaimet Senis.



**MINISTA bilong Envauiromen na Konsevesen, John Pundari.**

Birua bilong klaimet senis i kamap bikpela na ol liklik ailan kantri i wok long kisim bikpela bagarap taim ol i wok long bungim bikpela ren, strongpela win, na level bilong solwara i kamap antap na i laik daunim graun.

Mista Pundari i tok PNG i gat wanpela lo pinis. Palamen i kamapim dispela lo long helpim ol manmeri i stap gut, na ol i ken kisim sapot long gavman na intanesenel ogenais-esen.

“Dispela lo i tok long wanem kain ol samting gavman i mas mekim long sevim manmeri taim ol i bungim birua bilong klaimet senis,” Mista Pundari i tok.

Em i tok PNG i kamap namba tri kantri insait long wol long kamapim dispela kain lo.

“Mipela i kamap namba tri kantri long kamapim dispela kain lo bilong daunim na lukluk long birua bilong klaimet senis,” Mista Pundari i tok.

Em i tok long sait bilong Pasifik Ailan kantri, PNG i wok long go pas long mekim ol wok na dispela i soim olsem PNG i kamap lida long Pasifik rijon.

“Planti ol liklik alan kantri na poroman bilong yumi long Pasifik bai kisim bikpela hevi. Ol i wok long bungim ol bikpela hevi taim strongpela win i wok long bagarapim ples, level bilong solwara i kirap na laik daunim graun.

“Dispela em ol birua bilong klaimet senis. Long lain bilong yumi long Katearet Ailan long Bogenvil i wok long bungim dispela hevi.

“Gavman i go pas long daunim dispela hevi,” em i tok.

**GREN** Sif Sir Michael Ogio, Gavana Jeneral bilong Papua Niugini i salim bikpela tok sori bilong en i go long dai bilong namba wan meri jas, Jastis Catherine Davani na long dai bilong Memba bilong Saut Flai Open na Deputi Spika, Aide Ganasi.

Gren Sif Sir Michael Ogio husat i stap long haus sik long Brisbane, i tok em i bin kirap nogut na sori tru long taim em i harim long dai bilong Memba, Aide Ganasi long Tunde moning taim na Jastis Catherine Davani long las wiken.

“Ledi Esmie na mi yet i salim tok sori bilong mitupela i go long ol famili na pipel bilong Saut Flai long dai bilong papa na Memba bilong ol Aide Ganasi.

Mista Ganasi i gat strongpela bilip long ol pipel bilong em i mas kisim ol gutpela samting we ol risos bilong ol i kamapim



**Memba Saut Flai, Aide Ganasi**

na em i wok hat tru long kisim ol dispela samting bilong ol pipel bilong en.

“Em i bin wok long kantri bilong em gut long taim em i stap olsem Deputi Spika bilong Ne-

senel Palamen.

Mi gat bikpela tok tenkyu long Mista Ganasi long givim bikpela sapot long Nesenel Palamen Spika, Theo Zurenuoc, husat nau i stap Ekting Gavana Jeneral na mekim wok long taim mi no stap. Mi salim tok sori bilong mi tu i go long Spika bilong Nesenel Palamen, Theo Zurenuoc long lusim wanpela gutpela sapota na wanwok bilong en.

Ol pipel bilong Saut Flai i lusim wanpela gutpela lida bilong ol em Aide Ganasi,” Gren Sif Sir Michael i tok.

“Mi makim maus bilong Ledi

Esmie, tu na mi salim tok sori bilong mitupela i go long famili bilong Jastis Catherine Davani. Olsem namba wan meri jas long Papua Niugini, Jastis Davani i bin wanpela nambawan jas husat i givim em yet olgeta long wok bilong jastis na em i gat rispek na luksave long olgeta Papua Niugini na long intenesenel tu. Papua Niugini i lusim wanpela gutpela piksa bilong ol meri na ol yangpela pikinini meri..”

“Larim gutpela stori bilong em, strongpela tingting bilong en na sevis bilong em long kantri i kamap olsem as bilong gutpela tingting long yumi na long ol tumbuna lain i kam bihain na long kantri bilong yumi.

“Mipela pre long ol famili bilong Deputi Spika, Aide Ganasi na Jastis Catherine Davani, long bel isi na gutpela tingting long dispela taim bilong hevi na wari,” Gren Sif Sir Michael i tok.

## Gavman mas kirapim Saut Kos Haiwe

WANPELA namba wan rot insait long kantri we planti pipel na bisnis haus bai kisim benefit long em em i Saut Kos Rot long Is na Wes Nu Briten Provins.

Memba bilong Pomio, Elias Kapavore, i tok dispela rot i ken bringim panti gutpela samting, kirapim panti nupela bisnis na bringim moa sevis i go daun long pipel sapos rot i stap gut,

tasol gavman i givim moa luksave na sapot long kirapim dispela rot, na larim em i kamap gutpela rot.

Mista Kapavore i tok Saut Kos rot bai kirapim planti egrikalsa projek bikos i gat tupela bikpela wel pam plantesin i stap long hap.

“Graun long dispela hap em i gutpela tru na mi bilip olsem

sapos gutpela rot i stap, dispela ples i ken kamap wanpela egrikalsa fam bilong kantri,” em i tok.

Minista bilong Nesenel Plening, Charles Abel, i tok em i wanbel long dispela toktok na plen bilong memba bilong Pomio.

Mista Abel i tok gavman i putim moa mani long kirapim ol

nupela rot na opim ol ples long larim divelopen na sevis i go insait.

“I gat ol misin link i stap. Dispela Saut Kos rot em i wanpela misin link na mipela bai joinim. Gavman i gat plen long joinim dispela rot,” Mista Abel i tok.

Dispela Saut Kot Haiwe em i narapela rot i joinim Kokopo long Is Nu Briten na Kimbe long Wes Nu Briten Provins.

## Duma laik lukluk long pawa saplai

MINISTA bilong Pablik Entaprais, William Duma, i tok PNG Power i laik lukluk i go insait long ol arapela wei bilong kamapim pawa long PNG.

Mista Duma i mekim dispela toktok long Palamen taim

memba bilong Sumkar, Ken Fairweather, i askim em sapos PNG Power i gat plen

Mista Fairweather i askim Mista Duma long kisim ol wok manmeri o insignia bilong PNG Power i go long Karkar Ailan

long sekim na mekim stadi long lukim sapos ol hotwara i kam aut long graun i ken kamapim jiotemal eneji.

Mista Fairweather i tok bikpela hot wara i save kamaut long Karkar Ailan i ken kamapim pawa na apim level bilong pawa saplai long Madang na arapela senta na taun.

“Mi laik PNG Power long kam lukluk raun long Karkar Ailan. Bikpela hot wara i save kamaut long ailan.

“Na dispela i hot wara i ken kamapim jiotemal eneji na kamapim pawa saplai. Karkar ailan em i no long we long meinlen o bikples.

“Yumi ken pulim pawa rop aninit long solwara na i kam olgeta long Madang taun. Dispela pawa saplai i ken saplaim Ramu Nikel main na Yandera Gol Projek long Madang Provins, na Wafi-Golpu main long Morobe Provins,” Mista Fairweather i tok.

Mista Duma i tok PNG Power i wanbel tru long kamapim dis-

long sekim na mekim stadi long lukim sapos ol hotwara i kam aut long graun i ken kamapim jiotemal eneji.



**William Duma**

pela nupela pawa projek long apim level bilong pawa saplai.

Mista Duma i tok tok wantaim ol bikman bilong PNG Power na lukluk long kirapim wanpela nupela pawa projek long Karkar ailan.

“PNG i gat olgeta risos bilong kamapim pawa saplai. Yumi gat maunten wara, san, hoit wara bilong jiotemal, win na oil na ges bilong mekim pawa.

“Mi amamas long harim dispela. Mi bai toksave long ol lain long PNG Power na ol i ken lukluk long dispela,” Mista Duma i tok.

## Westen Provins gat wanpela memba tasol long Palamen

WESTEN Provins i gat wanpela memba tasol long Palamen bihain long Memba bilong Saut Flai, Aide Ganasi i dai long Tunde long dispela wik.

Kot i bin saspandim Gavana Ati Wobiro na Memba bilong Not Flai, Boka Kondra, na tupela i no moa stap long Palamen.

Memba bilong Midel Flai, Roy Biyama, tasol i stap long Palamen.

Long Tunde long dispela

wik, Mista Biyama i makim maus bilong ol pipel bilong Westen provins na salim tok sori i go long famili bilong Mista Ganasi.

Praim Minista Peter O’Neill i salim tok sori bilong gavman i go long famili na pipel bilong Saut Flai bihain long memba bilong ol, Aide Ganasi, i dai.

Mista O’Neill i tok Mista Ganasi i mekim planti gutpela wok long Saut Flai distrik bilong em insait long liklik taim tasol.

“Em i save tokim mi long ol projek em i mekim long Daru Sekenderi Skul, na arapela ol sevis em i givim long ol pipel,” Mista O’Neill i tok.

Mista O’Neill i tok Mista Ganasi em i wanpela strongpela lida husat i save sanap strong long toktok bilong em taim em i laik mekim disisen long dispela kantri.

Memba bilong Vanimo-Green, Belden Namah, i tok em i bin save long

Mista Ganasi taim tupela i bin stap long PNG Difens Fos.

“Mista Ganasi em i bin sevim PNGDF olsem wanpela strongpela ami opisa. Em i sevim kantri bilong em olsem soldia, na em i sevim gavman gen olsem wanpela lida bilong yumi,” Mista Namah i tok.

Em i salim tok sori bilong em wantaim ol pipel bilong Vanimo-Green i go long famili bilong Mista Ganasi na pipel bilong Saut Flai.

# Kot i pasim mani bilong Midel Flai

**MINISTA** bilong Maining, Byron Chan, i tok Non-CMCA (Community Mine Continuation Agreement) Fan mani bilong ol manmeri long Midel Flai Distrik bilong Westen Provins i stap yet long tras akaun bilong kot bikos kot i stopim gavman long yusim.

Mista Chan i tok dispela mani bai go long givim ol namba wan sevis we ol pipel

bilong Midel Flai i nidim long en, tasol kot i holim bek dispela mani, na em i stap yet long han bilong kot.

Mista Chan i tok em bai sindaun wantaim Praisim Minista Peter O'Neill na Atoni Jeneral Ano Pala long stretim ol toktok aninit long lo long larim ol manmeri long Midel Flai i kisim ol mani i stap insait long dispela Non-CMCA Fan.

Dispela fan em i mani bilong ol manmeri husat i stap long Midel Flai long Westen Provins na ol i save kisim dispela mani olsem kompensasin mani i kam long Ok Tedi Mining Limited (OTML).

Taim Flai Riva i kisim bagarap long ol pipia na kemikel no gut i kam long Ok Tedi kopa main, ol pipel i stap long Midel Flai i kisim bagarap bikos bus, graun

na wara bilong o i bagarap tu.

Mista Chan i mekim dispela toktok taim Memba bilong Midel Flai, Roy Biyama, i askim em wanem taim ol pipel bilong em long Midel Flai bai kisim dispela mani.

Mista Biyama i tok ol pipel bilong em long Midel Flai i nidim dispela mani long kirapim nupela haus sik na skul long Balimo.



**PALAMEN  
NIUS**

## Papagraun mas rejistaim graun



Minista bilong Lens na Pisikel Plening, Benny Allen

OL papagraun ol manmeri husat i gat graun i mas rejistaim kastomari graun bilong ol i kamap rejistat len na holim taitel bilong graun, Minista bilong Lens na Pisikel Plening, Benny Allen, i tok.

Mista Allen i tokim Palamen long las wik olsem pasin bilong rejistaim kastomari len o graun em i wanpela gutpela pasin bikos em bai stopim ol manmeri long salim graun nating nating.

Mista Allen i tokim Palamen olsem graun em i wanpela namba wan samting long laip bilong ol manmeri long PNG.

"Pawa bilong lukautim graun na mekim bisnis long graun i stap wantaim yumi yet. Yumi mas tokim ol pipel bilong yumi long ol gutpela samting bilong rejistaim gran," Mista Allen i tok.

Em i askim ol memba na gavana long tokim ol pipel bilong ol long rejistaim graun na kisim len taitel.

Long ol sait bilong bikpela graun, Mista Allen i tok em i gutpela moa sapos ol klen o wan pisin i mekim inkoporetet len grup (ILG) na holim ILG setifiket.

Mista Allen i singautim ol manmeri husat i wok long salim graun long ol ausait manmeri long no ken salim graun bilong ol.

"No ken salim graun nating. Graun em i wanpela namba wan samting long laip bilong yumi. Mi laikim yupela (ol memba) long skruim dispela toksave go moa long ol pipel bilong yupela.

"Tokim ol long no ken salim graun bilong ol. Mi les long yumi salim graun i go long ol ausait manmeri," Mista Allen i tok.



Memba bilong Maprik, John Simon i nau ekting spika.

## Fainens Minista: Goroka maket mas kirap

GOROKA Maket em i wanpela gutpela maket insait long PNG na em i mas senis na kirap, Fainens Minista James Marape i tok.

Mista Marape i tok pasin bilong kros na pait insait long distrik yet i no ken pasim developmen i kamap long Goroka Maket.

Mista Marape i mekim dispela toktok long Palamen long las wik taim em i laik bekim

wanpela askim bilong Gavana bilong Isten Hailans, Julie Soso.

Mis Soso i askim sapos Minista Marape i save long wanem samting i wok long kamap long Goroka Maket.

"Mi laik askim sapos Fainens Minista i givim sampela mani long kirapim Goroka Maket o nogat? Woks i bin putim pablik tenda sampela taim i go pinis na provinsal gavman i laik kirapim dispela maket gen," Mis Soso i tok.

Mista Marape i tok gavman i givim mani long dispela projek na em i lukim mani i stap long tras akaun.

Em i tok em bai askim CSTB long putim aut pablik tenda notis long niuspepa na askim ol kontrakta long bid na resis long kirapim dispela projek.

"Mi no lukim wanpela gutpela as long ol i holim bek mani bilong dispela maket projek.

"Mi bai tokim Sentral Saplai

na Tendas Bod (CSTB) long long givim tenda na larim projek i kamap.

"Fainens Dipatmen i givim mani bilong dispela projek pinis. Mani i stap long tras akaun. Mi no save em i mekim wanem i stap long tras akaun.

"Em i mas mekim wok. Mi bai askim ol lain long CSTB long putim tenda i go aut na larim projek i stat," Mista Marape i tok.



WE ARE **BSP**

**BANK  
WHERE  
YOU ARE**

A BSP Agent provides you access to basic banking services anywhere in PNG.

**Do your banking where you are!**



# Transpot sekta strongim patnasip

DIPATMEN ov Woks na Hai Komisin bilong Australia (AHC) i sainim wanpela agrimen long larim Australia i givim teknikel sapot long Dipatmen ov Woks aninit long Transpot Sekta Sapot Program.

Dispela nupela agrimen bai kamapim wokbung namel long gavman bilong PNG na Australia na skelim ol wok long kamapim seif na strongpela transport netwok long PNG.

Seketeri bilong Woks Dipatmen, David Wereh, i tok Woks Dipatmen i save mekim bikpela wok long stretim na kirapim rot na bris long larim ol manmeri i ran gut long gutpela rot netwok insait long kantri.

"Dipatmen bilong Woks i mas redi long skelim ol nid bilong ol manmeri na stretim hevi bilong ol.

"Dispela plen bai putim yumi long gutpela mak long givim gut sevis long ol pipel na long joinim ol manmeri na komyuniti na groim bisnis," Mista Wereh i tok.

Dispela nupela agrimen bai lukim Dipatmen ov Woks i kisim sapot long mekim gutpela plen long rot netwok, infomesen menesmen bilong rot aset, kisim



Woks Seketeri David Were i sanap na tok-tok.



Minista Kaunsila bilong AHC, Benedict David (lephan) na Seketeri bilong Woks Dipatmen, David Were.



Minista Kaunsila bilong AHC, Benedict David (lephan) na Seketeri bilong Woks Dipatmen, David Were.

sapot risos, kirapim gutpela saplaid sistem, na fainensal menesmen.

Aninit long dispela nupela agrimen na wok plen, Australia bai givim sapot long Woks Dipatmen i go inap 2019, na i go moa yet.

"Dispela long-tem patnasip namel long PNG na Australia bai kamapim stabiliti we dipaten i nidim long larim ol sistem i wok.

"Dispela strongpela teknikel sapot billong Australia bai go long bikpela nid PNG i gat long en.

"Pasin bilong strongim dipatmen bai kamapim planti gutpela samtng na helpim dipatmen long givim moa sevis na developmen lng pipel," Mista Wereh i tok.

Minista Kaunsila bilong AHC, Benedict David, i bin makim maus bilong Gavman bilong Australia, na

sainim dispela nupela agrimen.

Mista David i tok em i luksave long bikpela wok dispela patnasip bai mekim long apim level bilong wokbung namel long tupela gavman na kamapim gutpela samtng long transpot sekta.

"Australia i amamas long givim dispela sapot long transpot sekta bilong PNG.

"Australia bai sapotim len transpot, maritaim (sip o transpot bilong solwara) na aviesen (balus).

"Australia i amamas long helpim PNG i kamapim gutpela transpot netwok sistem. Gutpela transpot netwok sistem i ken helpim dispela kantri long kirapim sosel na ikonmik developmen," Mista David i tok.

## Madang man no wanbel long K10,000 nominesen fi

James G. Kila i raitim

WANPELA komyuniti lida long Usino-Bundi Gama Ilektooret long Madang provins, Samuel Masawa i no wanbel long disisen bilong nesenel gavman long apim nominesen fi i go antap long K10,000.

Masawa i tokaut long bel-hevi bilong em na i tok olsem i gat planti ol gutpela lida i stap long ol wan wan wod na lokal level gavmen eria husat i redi long sanap na makim ol pipel long 2017 Nesenel Ilek-sen wantaim em K1,000 nominesen fi.

Tasol nau nominesen fi em antap na planti i no wanbel.

Em i tok olsem dispela K1,000 em mani we i putim nau ol lida i stap long Nesenel Palamen, bikos em nominesin fi bilong bipo. Tasol nau ol MP i kisim pawa na mekim disisen long apim fi go antap long sevim ol yet bikos ol i stap wantaim pati long gavman husat i gat mani.

Namba tu risen bilong bel-hevi bilong Masawa em olsem em i no fe bikos dispela ileksen bai lukim ol mani man tasol bai sanap, na ol man i gat liklik mani bai no gat sans. Dispela em i no gutpela pasin, na em stopim raits bilong olgeta man long



Samuel Masawa i autim bel-hevi bilong em na soim niuspepa i tokaut long nominesen fi bai go antap.

sanap long ileksen.

Narapela risen Masawa i givim em olsem dispela ileksen nau bai lukim ol man husat i save stap long taun na i gat mani, bikos ol i sevim mani long wok na nau laik resis long ileksen. Dispela i no fea long ol liklik man long ples na hauslain.

"Planti dispela ol lain long taun na siti i no save stret long nid tru bilong ol liklik manmeri na pipel long ples na hauslain," Masawa i tok.

Em i tok planti ol dispela lain husat bai sanap long 2017 ileksen em ol pablik sevan na ol bisnisman husat i gat mani pinis, na planti bai no wari long baim dispela K10,000 nominesen fi.

Tasol tarangu ol komyuniti

lida long ples, husat save wok long keskrop na salim gaden kaikai, rotsait maket na ol arapela infomel bisnis bai painim hat taim tru long bungim K10,000 olsem nominesen fi long 2017 Nesenel Ilek-sen.

Em i tok gavman i mas tokaut long senis long nominesen fi longtaim yet. Dispela bai givim inap taim long ol liklik man o komyuniti lida long ples long redim ol yet gut.

Masawa i tok maski olsem dispela nominesen fi em antap tumas, em bai resis yet long 2017 ileksen. Em i tok tingting bilong em long sanap na makim ol liklik fama, groa na ol liklik egrikalsa projek long eria bilong em long Usino-Bundi Gama ilektooret.



### URGENTLY REQUIRED

Free lance Advertising Sales Representative to sell Space Advertising and Bulk Subscription of *Wantokniuspepa* to government departments, Business houses, churches, schools & institutions, NGOs and interest individuals in their respective Provinces.

Are you retired, out of work or looking for something to do, this will be an ideal opportunity.

Attractive incentive is available to people who are willing to help themselves at their own time.

#### Qualifications;

- Previous experience in selling advertising space or related industry but not necessary
- Living in provincial towns with own accommodation
- Own car
- Contactable mobile phone/Emails etc

If you meet the above criteria please send your expression of interest in the first instances to:

The Sales and Marketing Manager, Word Publishing Company Limited. P.O.Box 1982, BOROKO NCD. Ph: 3252500, Mobile Ph. 79187688 or email [advertising@wantokniuspepa.com](mailto:advertising@wantokniuspepa.com) [lbents@wantokniuspepa.com](mailto:lbents@wantokniuspepa.com)

Applications Close 4th of November 2016.



# PIH Saveman Nius

"I kam long Pacific International Hospital Port Moresby"

Ph: 311 3000 and 799 88000 Website: www.pihpng.com

# Coronary Angioplasty

**Overview**

**Coronary angioplasty (AN-jee-o-plas-tee), also called percutaneous coronary intervention, is a procedure used to open clogged heart arteries. Angioplasty involves temporarily inserting and inflating a tiny balloon where your artery is clogged to help widen the artery.**

Angioplasty is often combined with the permanent placement of a small wire mesh tube called a stent to help prop the artery open and decrease its chance of narrowing again. Some stents are coated with medication to help keep your artery open (drug-eluting stents), while others are not (bare-metal stents).

Angioplasty can improve symptoms of blocked arteries, such as chest pain and shortness of breath. Angioplasty can also be used during a heart attack to quickly open a blocked artery and reduce the amount of damage to your heart.

**Why is it done**

Angioplasty is used to treat a type of heart disease known as atherosclerosis. Atherosclerosis is the slow buildup of fatty plaques in your heart's blood vessels. Your doctor might suggest angioplasty as a treatment option when medications or lifestyle changes aren't enough to improve your heart health, or if you have a heart attack, worsening chest pain (angina) or other symptoms.

Angioplasty isn't for everyone. If the main artery that brings blood to the left side of your heart is narrow, if your heart muscle is weak or if you have multiple diseased blood vessels, then coronary artery bypass surgery may be a bet-

ter option than angioplasty. In coronary artery bypass surgery, the blocked part of your artery is bypassed using a blood vessel from another part of your body.

If you have diabetes and multiple blockages, your doctor may suggest coronary artery bypass surgery. The decision of angioplasty versus bypass surgery will depend on the extent of your heart disease and overall medical condition.

teries. These plaques can also rupture, causing a blood clot.

When placing a coronary artery stent, your doctor will find a blockage in your heart's arteries (A) using cardiac catheterization techniques. A balloon on the tip of the catheter is inflated to widen the blocked artery, and a metal mesh stent is placed (B). After the stent is placed, the artery is held open by the stent, which allows blood to flow through the previously blocked artery (C).

**Results**

Coronary angioplasty greatly increases blood flow through the previously narrowed or blocked coronary artery. Your chest pain generally should decrease, and you may be better able to exercise.

Having angioplasty and stenting doesn't mean your heart disease goes away. You'll need to continue healthy lifestyle habits and take medications as prescribed by your doctor.

If your symptoms return, such as chest pain or shortness of breath, or if other symptoms similar to those you had before your procedure recur, contact your doctor. If you have chest pain at rest or pain that doesn't respond to nitroglycerin, call 911 or emergency medical help.

To keep your heart healthy after

tery requires an incision in the chest, and recovery from bypass surgery is usually longer and more uncomfortable.



**You can trust us when it comes to your heart**

Our hospital has been nationally recognized for helping people with heart problems improve their health and enjoy healthier lives. PIH focuses on detection, treatment, prevention and follow-up. Whether you have a common or complex heart problem, PIH is a trusted source for superior technology and compassionate care. Giving our patients and their families a positive experience every time is our priority.

PIH's visiting Interventional Cardiologist (Dr. Vineet Sankhla) shall be in Moresby between 18<sup>th</sup> November till 21<sup>st</sup> November. During his stay he shall be

available for providing second opinion to the cardiac patients and shall also perform Angiogram and Angioplasty procedures. We are offering a discount of **40% on the Angiogram** and **20% discount on the Angioplasty**. The total package for Angiogram now is **Kina 6,000** and Angioplasty (**single stent**) is **Kina 24,800**.

If you have any further queries about Cath Lab or Angioplasty, please feel free to email us at [info@pihpng.com](mailto:info@pihpng.com) or simply walk in and ask to be shown around the new facility.



© FOUNDATION FOR MEDICAL EDUCATION AND RESEARCH. ALL RIGHTS RESERVED.

angioplasty, you should:

- Quit smoking
- Lower your cholesterol levels
- Maintain a healthy weight
- Control other conditions, such as diabetes and high blood pressure
- Get regular exercise

Successful angioplasty also means you might not have to undergo a surgical procedure called coronary artery bypass surgery. In a bypass, an artery or a vein is removed from a different part of your body and sewn to the surface of your heart to take over for the blocked coronary artery. This sur-



**OUR ADVANCED CARDIOLOGY SERVICES ENSURE YOUR HEART IS IN SAFE HANDS**

**Why fly abroad, when help is within reach at PIH**

PIH announces a special price of Kina 6000 on **Coronary Angiogram** and **20% discount** on **Coronary Angioplasty**. Get a consultation or second opinion at home with overseas cardiac specialist, **Dr Vineet Sankhla** from India

Text **71999996** to book an appointment. Valid for sessions between **Nov 18 - Nov 21**



**Hurry and Pre-book Today First Come, First Serve Only**  
Pacific International Hospital: Sec 105, Lot 2, Taurama, 3 Mile, Port Moresby, PNG, Ph: 799 88 000  
info@pihpng.com | www.visioncity.com.pg | www.pihpng.com | www.facebook.com/pihpng @pihpng



# Tok bilong God senisim Heitz Bee



Heitz Bee Andrias wantaim meri bilong em Janet i bisi long infomol bisnis bilong tupela long Edmin kompaun trefik maket.

James G. Kila i raitim

**PLANTI ol yangpela man husat i save bikhet na dring bia na mekim kain kain trabel pastaim, nau i tanim bel na harim lotu na bihainim gutpela pasin em Papa God i laikim.**

Wantok Niuspepa i bungim wanpela yangpela man bilong Bomai eria long Gumine, distrik long Simbu provins sampela taim i go pinis taim dispela man em wanpela bikhet man stret.

Em save i smok mariwana, dring bia na kamapim trabel long rot long eria bilong em long Bomai kona long

Edmin Kompaun long Madang taun.

Bihain long planti ya Heitz Bee Andrias i wok bikhet na wokim kain kain pasin nogut bilong graun, em i pilim olsem em i no gutpela.

Yangpela man ya i marit long Wali long Madang yet na i gat tupela pikinini em Peter na Vero.

Tok bilong Papa God tasol i senisim dispela yangpela man long sampela mun i go pinis, na nau Heitz Bee save go lotu long Rivaivel Senta ov PNG long haus lotu bilong ol long Meiro. Em wantaim meri bilong em na tupela pikinini save go

wantaim long lotu.

Wanpela papa bilong em Peter Morgan wantaim famili bilong em i givim gutpela skul toktok bilong baibel na tok bilong Papa God, we i givim paia na lait long rot bilong Heitz Bee na tude em senisim pasin na kamap gutpela famili man.

Tude, Heitz Bee wantaim meri bilong em Janet wantaim tupela pikinini i save salim ol stua samting olsem infomol bisnis long edmin kompaun trefik opis maket eria.

Ol i save praim sosis na banana na salim long ol kastoma.

# Madang i sori long dai bilong tupela memba bipo

## Stanley Pil na Tom Pais

James G. Kila i raitim

MADANG taun i gat bikipela sori long dai bilong tupela olpela memba bilong palamen, Stanley Pil husat i bin stap memba bilong Madang taun ilektoret na Tom Pais husat i bin pastaim Rijonal Memba bilong Madang.

Stat long las wiken i kam olsem Madang taun i bin lukim blak klaut i karamapim ples na skai i stap tudak long de taim. No gat ren i pundaun long de taim tasol ples stap tudak na ples i stap sori .

Dispela kain sori i soim stret olsem Madang i stap long taim bilong sori, bihain long dai bilong tupela biknem man na pastaim memba bilong

palamen (MP) husat i makim Madang provins.

Las wiken i lukim dai bilong pastaim rijonal MP bilong Madang, Tom Pais. Dispela lida i bin makim Madang long rijonal sia long 1987 i kam 1992. Mista Pais em bilong Awar long Bogia distrik long Madang na em i wanpela gutpela lida husat i holim ministri pastaim long gavman.

Long stat bilong dispela wik tasol narapela sori nius i kamap long Madang, taim tok save i go aut olsem pastaim MP bilong Madang na biknem bisnisman, Stanley Pil i lusim laip tu.

Stanley Pil, olsem bikipela bisnisman em i gat stua na sevis stesin

na em save sanap long ol ileksen long makim Madang planti taim. Dispela lida i gat gutpela pasin na planti pipel long Madang i save laikim na soim rispek long em.

Ripot i tokaut olsem Pil i bin sik sampela taim na i bin go long kisim helpim long Singapore we em i dai.

Mista Pil em bilong Westen Hailans provins tasol em stap longpela taim tru long Madang provins na ol asples pipel bilong Madang long Siar viles i kisim em olsem pikinini bilong ol stret.

Planti ol lain wanpisan bilong em na ol sapota bilong em stat long Mande na Tunde i rabim graun na bung long haus kraik bilong

em long Kina bis long soim sori long dispela gutpela lida man.

Pil em wanpela gutpela lida husat i stap pastaim olsem MP bilong Madang Open na i kisim ministri tu long gavman. Em i bin stap olsem polis minista na bihain long dispela em i kisim wok olsem siaman na dairekta bilong bod bilong ol ogenaesen bilong gavman.

Mista Pil i bin stap longtaim long Madang na planti ol lokal pipel na ol asples lain save soim rispek long dispela lida.

Bodi bilong dispela lida i no kamap yet long Madang we program i stap long pablik baibung na soim rispek long em.

# Madang provinsal gavman gat bikipela dinau long ol sevis lain

SAMPELA lokal kontrak kampani long Madang i salensim Madang provinsal gavman long kot nau bikos em no baim ol bikipela mani

long sevis wok ol i wokim.

Wanpela bilding kontrakta long Madang i tokaut olsem Madang provinsal gavman i no

baim moa K4 milien long ol bilding kontraksen sevis em i mekim.

Bonny Pongo, husat i go pas long Hans Konstraksen kampani i tokaut long dispela bikos em wantaim ol arapela kontrakta husat i mekim wok aninit long rurel edukesen sevises impruvmen program i no kisim yet mani bilong ol stat long 2008 i kam inap nau.

Long las mun antap kot i bin givim oda long Madang provinsal gavman i baim moa long K1.5 milien i go long tupela haia kar kampani long sevis ol i givim tasol provinsal gavman i no baim yet.

Jastis David Cannings i givim oda long Nesenel Kot long Madang las mun antap olsem Madang provinsal gavman mas baim Bismark Car Rental Limited K154,381.76 na Flying Fox Nest Limited K1,425,725 mani.

Jas Cannings i givim oda bihain long Madang provinsal gavman in no baim tupela kampani long taim stret na intres i go antap.

Kot i tokaut olsem Bismark Car Rental i bin

sainim kontrak agrimen wantaim Madang provinsal gavman long 2014 long haia kar bilong em long flet reit, na em i kisim ol kar na yusim tasol em i no baim long taim stret long peim em Me 2015.

Olsem na kot i givim oda long Madang provinsal gavman long baim K153,400 olsem total mani mak long dinau em i gat na ol bagarap i kamap long sampela kar, na intres em K981.76. Dispela i bringim mak i go antap long K154, 381.76.

Loya husat i makim Fox Nest Limited, Baffinu Wak bilong Kunai Loyas, i tok olsem i gat ol arapela lain husat i givim ol sevis long Madang provinsal gavman i putim pinis ol kot pepa bilong ol bikos provinsal gavman i no baim ol yet.

Em i tokaut tu olsem pasin bilong haia kar em wanpela kain pasin Madang provinsal gavman save laik long mekim na dispela i givim hevi long gavman, tasol ol opisa bilong provinsal gavman i go het na haia ol kar yet.

# Memba bilong Saut Flai i dai

MEMBA bilong Saut Flai Aide Ganasi i dai long Tunde moning long dispela wik long Pot Mosbi.

Mista Ganasi, husat i Deputi Palamen Spika, inap long sindaun long sia bilong Palamen Spika long Tunde moning taim Palamen i bung bikos Palamen Spika Theo Zurenuoc i kamap ekting Gavana Jeneral taim Sir Micheal Ogio i stap long haus sik.

Tasol Mista Ganasi i dai long moning na olgeta memba bilong palamen i bin kirap nogut long harim dispela nius taim Asisten Palamen Spika, John Simon (memba bilong Maprik), i tokaut taim Palamen i bung gen Tunde moning.

Ol famili memba i tok Mista Ganasi i no bin sik tasol em i pundaun long moning long Tunde long dispela wik long haus bilong em long Waigani.



Poto i soim Memba bilong Saut Flai, Aide Ganasi(namel) i redi long go insait long palamen wantaim tupela klak las wik bipo em i dai long Tunde dispela wik.

Taim ol i karim em i go long haus sik long Pacific International Hospital, em i pulim las win bilong em, na em i dai.

Ol i karim bodi bilong Mista Ganasi i go long Funeral Home long Erima na ol dokta bai mekim wok painimaut o

pos motem long sekim wanem kain sik i bringim dai bilong dispela lida bilong kantri.



Gavana Potape

# Stopim pasin bilong sasim bikpela mani long graun

GAVANA bilong Hela, Francis Potape, I salensim ol manmeri long Hela long stopim pasin bilong sasim bikpela mani long graun.

Mista Potape i tok gavman sevis i hat long go long pipel taim ol manmeri i gat pasin bilong sasim bikpela mani

long graun taim gavman i laik karim developmen i go insait long ples.

Mista Potape i tok ol manmeri i mas larim graun i stap nating na frim graun sapos ol i laik lukim tru tru gavman sevis.

"Pasin bilong mekim haus arere long rot taim

gavman i laik mekim rot. Pasin bilong planim ol diwai na arapela samting ol graun we gavman i gat plen long kirapim sampela bikpela developmen.

"Dispela kain pasin i mas stop nau. Sapos ol pipel i laik lukim gavman sevis, ol i mas lusim

dispela kain pasin na tingting.

"Dispela pasin na tingting bai no inap helpim ol manmeri. Em bai no inap helpim ol manmeri long kisim sevis na developmen.

"Ol manmeri i bai stap long tudak yet bikos long pasin no gut

bilong ol yet. Provins bilong yumi em i nupela tumas na gavman i nidim pipel long wok-bung wantaim," Mista Potape i tok.

Mista Potape i mekim dispela toktok taim em i go lukluk raun long Taki Taki LLG long Koroba Lake-Kopiago ilektoret.

## Yunaitet Stets i gat nupela Presiden - Donald Trump

Hillary Clinton i bin ringim Donald Trump long taim dispela vot namba i kamap na em i tok amamas long Mista Trump, olsem na ol i tokaut olsem Donald Trump nau em i kamap nupela presiden bilong US.

Donald Trump em i bikpela bisnis man tasol em i namba wan man long histori bilong US we i no gat wanpela save long Militri wok o long wok bilong politiks.

Maski planti Papua Niugini pipel na wol i ting olsem Seketeri Hillary Clinton i gat moa ekspiriens long politik na long stap olsem namba wan meri bilong Amerika taim man bilong em, Bill Clinton i bin stap olsem Presiden bilong Amerika, na tu em yet i bin stap olsem wanpela seneta na Seketeri bilong Stet, em i no winim dispela ileksen.

Tasol asde inap long 5 klok long apinun ol poling vot namba i kamap soim olsem Donald Trump bai win olsem na Hillary Clinton soim strong olsem Donald Trump, wanpela bikpela bisnis man we i save ranim ol bikpela hotel na ol haus rent bisnis, em i namba wan laik bilong planti pipel bilong Amerika.

Olsem na long 5 klok long apinun (PNG taim) Mista Trump i kisim 268 pesen bilong ol vot na Seketeri Clinton i bin gat 215 tasol. Long winim ileksen wanpela bilong tupela i mas gat 270 pesen vot bilong 532 total vot.

US em i wanpela bikpela demokresi kantri na ranim ileksen bilong ol em i ples kli na i no gat korapsen. Wanem kain risal i kamap em i soim stret laik na bilip bilong ol pipel bilong Amerika. Tupela politikal pati long resis em Demokrat na Ripabliken. Hillary Clinton i ran long Demokrat an Donald Trump i resis long tiket bilong Ripabliken.

US Embeseda long Papua Niugini, Catherine Ebert Gray i bin bungim ol midia na ol diplomat wantaim sampela lain long gavman olsem Minista bilong Komyuniti Developmen, Yut, Meri na Sios na Memba bilong Sohe, Delilah Gore long haus bilong em long bung na lukim kamap bilong ol poling.

Embeseda Gray i tok moa long 100 milien Amerika i tromoi vot bilong ol long asde na bai ol i no inap long tokaut long bekim bilong ol vot inap olgeta Stet i kaunim olgeta vot bilong ol na Salim i go long bungim namba.

Em i tok ol pipel bilong Amerika i save bilip long pasin bilong demokrasi na ol i lukim olsem olgeta man i putim vot long makim Presiden na ol Seneta bilong makim ol em i namba wan tul bilong pasin demokrasi.

Kamap bilong ol vot em olsem Donald Trump i bin go pas moa long planti stet na em i kisim ol vot tu long ol hap we ol i save sapotim democrat olsem ol i bin votim Presiden Obama husat em i wanpela bilong ol demokrat Presiden.



# PNG Air

CENTRAL RESERVATIONS

Phone: + 675 7222 2151 | Fax: + 675 325 4867  
TOLL FREE NUMBER 16111 | Email: reservations@pngair.com.pg

# Ol poto long palamen i sindaun las wik

**PALAMEN** i sindaun tripela wik olgeta bilong dispela ya. Long wik antap ol sindaun long putim Baset i kam aut long palamen na olgeta Memba na Minista bai lukim hamas mani ol bai kisim long ya i kam.

Long las wik ol sindaun long tok orait long sampela bil na autim toktok wari bilong ol na wetim oposisen long lukluk long dispela baset bilong 2017.

Dispela wik ol Oposisen i bekim tingting bilong ol long dispela Baset bilong 2017 we sampela samting i no go gut long tingting bilong ol.

Long dispela wik tu palamen i lusim namba 2 spika bilong ol na dispela i mekim palamen i no pinisim gut sindaun bilong ol.

Oposisen nau i tingting long karim dispela Baset bilong 2017 i go long Suprim Kot long Waigani.

Wantok Niuspepa i putim sampela poto bilong las sindaun bilong palamen bilong dispela 2016 na baset.

Poto Stori Nicky Bernard



Seketeri bilong Treseri na Iektoral Komisina i wokabaut i kamap aut long Baset lokap long Palamen haus.



Minista bilong Plening Charles Abel na Minista bilong Treseri Patrick Puraitch wantaim ol seketeri bilong ol i kam aut long baset lokap.



Sampela bilong ol dipamen het i kisim win bihain long baset lokap.



Namba 2 Spika wantaim tupela klak bilong palamen i redi long go insait long semba long las wik Fraide. Dispela kamera man i kisim las poto na las sekhan long namba 2 Spika bipo em go insait long semba.



Klak bilong palamen i soim Treseri Minista long wei bilong tokaut long baset.



Gren Sif Sir Michael T Somare i sekim baset pepa bilong las taim insait long palamen haus.



# Nogat TFF i bagarapim Goroka bisnis man

Sape Meta i raitim

**WANPELA** asples bisnisan long Goroka, Isten Hailans, nau i sot long mani na rausim 9-pela wokman bilong em bikos tupela skul long Madang provins i gat bikpela dinau long en.

Albert Kumura Yama, papa bilong Peruwo steseneri na prin stua long Goroka i tok olsem em i bin givim sevis wantaim gutpela bilip long ol dispela skul we em i helpim, tasol ol i bekim wantaim ol sek we i no gat mani long akaun bilong ol na benk i no kisim.

Mista Yama i tok olsem long wanem as na ol sek i no gat mani em bikos ol kwateli skul subsidi mani i no go insait long skul hariap na em i bagarapim bisnis bilong ol lain husat i wok long helpim ol skul wantaim ol sevis olsem ol steseneri na ol edukesen materiel i go long ol skul insait long kantri.

"Mi givim sevis na ol ste-



**Papa bilong Peruwo Steseneri na Prin stua, Albert Kumura Yama i holim piksa bilong sek mani i gat nem bilong kampani bilong em tasol no gat mani.** Poto: Sape Metta.

seneri saplai long tupela hai skul insait long Madang provins long las yia. Ol i raitim ol sek

long kampani bilong mi. Tasol taim mi putim sek i go long bisnis akaun bilong mi long

Goroka, mi no kisim wanpela samting bikos i no gat mani long ol dispela skul akaun. Nau yet mi tokim 9-pela wokman bilong mi long mi bai inap long holim bisnis bilong mi long go het yet," Mista Yama i tok.

Em i tok ol skul na bisnis i wok long pilim hevi bilong gavman i no bihainim maus bilong en na baim ol TFF o Tuisen Fi Fri subsidi mani i go long ol skul.

"Dispela hevi i kisim ol skul na bisnis na klostu taim bai ol i pasim ol skul na ol bisnis bai pundaun," em i tok.

Em i olsem wanpela man bilong givim sevis, mi pilim hevi bilong dispela na mi laikim tok strong long O'Neill-Dion gavman long hariap long inapim ol tok promis bilong ol long givim TFF mani i go long ol skul long taim, na ol dispela mani bai helpim ol skul long ran gut," Mista Yama i tok.



## Yumi hangamap long marasin

SIK em i kamap wanpela bikpela bisnis tru nau long olgeta hap bilong wol. Maski yumi no sik, taim yumi lukim sampela kain promosen bilong sampela kain marasin yumi save hariap tru sekim bodi bilong yumi.

Long ol taun i gat tupela kain pipel i stap. Ol lain husat i gat mani i save tok olsem ol i no gat taim long sindaun na wetim nes long lukim ol na ol i save save hariap tru long go long praivet dokta.

Narapela grup pipel em ol i save hatwok tru long stap insait long amamas bilong bikpela siti. Planti taim dispela ol lain i save sot tru long mani olsem na ol i save go sindaun na wetim nes.

Tupela grup wantaim i save kisim wankain sik. Bikpela sik long PNG em malaria na bihain long em, em ol kus sik.

Planti bilong ol dispela sik em yumi inap abrusim. Planti helt toktok i save tokim yumi long bihainim sampela rot long abrusim sik tasol yumi save iapas long ol dispela tok.

Bihain taim sik i bungim yumi, yumi save hariap tru spit i go long haus sik o praivet dokta.

Narapela nupela samting i wok long kam insait nau em ol kain kain marasin bilong mekim man o meri i no ken lapun hariap. Narapela marasin ol i wok long salim nau em long mekim bodi bilong yumi i kamap wait. Askim em olsem wanem samting i rong long man o meri i go lapun? Na wanem samting i rong long blak skin?

Papua Niugini i gat hevi long populesen bilong em i gro hariap tru na nau i gat moa long seven milien pipel. Planti pikinini i wok long kamap na man na meri i painim hat long stopim ol long karim pikinini hariap, hariap. Ol i nidim marasin long helpim ol.

Pasin bilong hangamap long marasin ol i mekim long ol longwe ples em i ken bagarapim yumi. Yes sampela taim bodi bilong yumi bai i bungim hevi na bai i nidim sampela spesel marasin. Dispela em i orait. Tasol sapos yumi hangamap long marasin tasol long helpim olgeta arapela hevi bilong yumi em yumi hangamap pinis.

Olsem wanem marasin tasol bai i stretim sik kus o hetpen o pekpek wara? Olsem wanem marasin tasol inap stretim yumi na bai yumi stap yangpela olgeta taim?

Long ol ples bilong yumi i gat planti save i stap long ol kain kain marasin i stap long bus, long ol wara, ol rip na long ol kaikai. Tasol marasin bisnis i no laik luksave long dispela ol marasin. Planti gutpela marasin i stap insait long ol fres kaikai bilong yumi tasol marasin bisnis i amamas long yumi kaikai ol kaikai long stua na kisim sik.

Yumi pilim gut long yusim sampela marasin long stretim sik o sampela arapela wari bilong bodi tasol lukluk gut yumi rabisim ol lokal save bilong yumi yet. Ol save we i bin lukautim ol pipel bilong yumi long planti tausen yia i go pinis. Yumi hangamap nau long save i kam long ausait na laip bilong yumi taim yumi sik em i stap long lukaut bilong ol arapela lain olgeta.

# ITI greduesen long Kavieng

**GAVANA** Sir Julius Chan i bilip olsem patnasip wantaim ol ki developmen patna long Nu Ailan em i kamapim strongpela Atonomas Gavman.

Sir J i tok, "Mipela long Nu Ailan i makim nupela kos long kamap patna wantaim ol long kamap wanpela atonomas provins."

Em i mekim dispela toktok long Intenesenel Trening Institut (ITI) namba wan greduesen long pinis bilong las mun long Peter ToRot Konprens Senta long Kavieng wantaim patnasip bilong ol sios na Australia Dokta Intenesenel.

Sir J i tok, "Kirap bilong nupela ITI kempas long mun Epril na lukluk bilong mipela long kirapim Nu Ailan Yunivesiti i strongim tingting bilong mipela long kisim Atonomi i go long narapela level bilong Nu Ailan."

"Inap long 9-pela yia, mipela i bin traim long kamapim ol nupela developmen polisi long Papua Niugini. Mipela i soim PNG olsem mipela i ken kamapim sindaun bilong mipela long bihain taim long tingting bilong mipela yet na kamapim ol polisi we i strongpela long mipela i wokabout i go long kisim Atonomi," Gavana Sir J i tok.

Sir Julius i toktok long ol developmen long provins bilong en olsem long 2007 i bin gat wanpela sekenderi skul tasol long Namatanai, nau long 2016 i gat



**Namba wan greduesen bilong ITI long Peter ToRot Konprens Senta long Kavieng.**

6-pela sekenderi skul na 4-pela hai skul, long 2007 ol i bin gat 25,000 sumatin i stap long olgeta kain skul long provins, na long yia 2016 i gat 633,000 moa sumatin i stap long olgeta kain skul.

Long yia 2007 Nu Ailan i bin stap klostu las namba mak bilong ol eksam long kantri tasol long yia 2016 Nu Ailan i kisim ples namel long 5-pela skul we i stap antap tru long kantri.

Long yia 2008, provins i bin tromoi K9 milien long Fri Edukesen na long yia 2016 provins i tromoi K73 milien olgeta.

Em i bin kaunim tu ol narapela bikpela developmen we gavman bilong en i bin kamapim namel long yia 2009 na 2016 we em i tok i kamapim gutpela piksa olsem Nu Ailan i bihainim stret rot bilong kisim

Atonomas gavman.

Sir J i tokim ol sumatin husat i greduet olsem ol i mas save long wanem kain ol hatwok gavman i putim long helpim ol na ol i mas save long wanem kain wei bai ol i helpim long wok bilong kisim Atonomi.

Sir J i tok amamas long Prinsipel bilong ITI, Nagulendran na man i helpim long kirapim ITI na Menesing Dairekta, Kumaran.

Em i tok, "Epril 12 em i wanpela bikpela taim insait long Edukesen program bikos long dispela de, 6-pela mun tasol bihain long yumi kirapim, yumi kam bung gen long lukim kaikai bilong visen na misin bilong Edukesen Polisi bilong yumi."

I gat 400 sumatin i go insait, na 290 nau i pinisim skul na kisim Setifiket long Komputing na Edministresen.

Sir J i bin go bek long lukim dispela greduesen bihain tasol long las sindaun bilong haus palamen.

Bihain long greduesen em i go long Kokopo long stap wantaim famili long lukim matmat bilong mama bilong en, Miriam Tinkoris bihain long 42 yia bilong em i bin dai pinis.

Bihain em i go long ples Nokon long lukim stat bilong konstraksen bilong nupela Tinkoris Helt Senta we em i givim nem bilong mama bilong en.

Long las wik, Sir J i bin stap long Gret 10 greduesen long Boliu Haiskul long Mussau Ailan long Trinde na i stap tupela moa de bikos ol komyuniti askim em long opim ol skul, helt klinik na Viles Kot haus long 4-pela hap.

## Save na Mekim

Sapta 2

...moa yet long hap 1 (Poteto)

### Kaikai bilong givim strong

## POTETO

Tok i go pas

Asples bilong poteto em i Amerika, taim ol waitskin i no bin kamap yet long dispela hap.

Bihain, ol Yurop i kisim long Amerika na planim long hap bilong ol. Bihain gen na em i kamap wanpela namba wan kaikai bilong ol Yurop. Tude long sampela hap bilong Papua Niugini tu, poteto i laik kamap wanpela bikpela samting, inap helpim man long kaikai na long wok bisnis. Em i olsem:

Long sampela hap bilong Westen Hailans na Sauten Hailans na Enga, ais i save pundaun na bagarapim gaden kaukau. Tasol ais i no save bagarapim tumas poteto. Olsem na potato inap kamap wanpela kaikai bilong ol. Na long ol stesin na taun, planti man i laikim poteto. Olsem na wok bilong planim potato i ken kamap wanpela bisnis bilong pulim mani tu.

Poteto i no kamap long ples hat long nambis. Sampela kain poteto inap kamap long maunten i no antap tumas, olsem 400 mita (em i 1,500 fit). Tasol mak tru bilong poteto i kamap gut, em i stat long 1,200 mita i go antap inap 2,100 mita (em i 4, 000 – 6, 500 fit).

Tok bilong planim

Nogut yu tok, poteto em i nupela samting tru long Papua Niugini. Nogat. Long sampela hap ol i kirapim wok long nau tasol. Na long sampela hap ol i bin planim bipo long Namba Tu Woa yet. Olsem na yumi laik soim tupela rot bilong wokim gaden poteto. Rot bilong didiman na rot bilong ples.

Tok bilong planim long rot bilong didiman

Ol didiman i wok strong long planim poteto long Westen Hailans na long Enga. Ol i soim yumi 6-pela lo bilong wokim gaden poteto, olsem:

Redim gut sid o pikinini bilong poteto.

Kisim pikinini bilong gutpela poteto tasol. Kisim ol namel namel sais. Bikpela poteto em i no gutpela tumas bilong planim. Bai yu mas katim long namel. Sapos yu laik katim, orait yu mas katim long taim yu kamautim long gaden. Yu no ken katim long taim bilong planim. Liklik poteto tu em tu i gutpela bilong planim.

Was gut long skin bilong poteto i mas stap gut olgeta. Sapos hap skin i tekewe pinis bai em i no inap kamap gut. Putim ol dispela pikinini poteto i mas i stap long ples kol na ples drai. Yu no ken karamapim strong tumas. Win i mas i go i kam long ol. Larim i stap olsem inap kru i kamap. Taim kru i kamap nupela yet, em nau yu mas planim. Yu no ken larim i stap nating na kru i go longpela. Em i nogut. Wanpela hap tok bilong pikinini poteto i stap yet, em i olsem: Sapos yu wari long sampela sik bilong yu orait, baim pikinini poteto long didiman tasol.

Lukim moa long nambu tu hap bilong tok bilong planim long rot bilong didiman neks wik

# Namba wan meri jas i dai

## ...Jastis Cathy Davani

ASKIM i go long ol yangpela meri Papua Niugini long kisim Jastis Davani olsem rol model bilong ol bikos em i bin namba wan meri husat i bin brukim banis na go insait long wok jas we ol man tasol i save mekim.

Praim Minista, Peter O'Neill i bin wokim dispela toktok taim em i bin salim tok sori bilong em long dai bilong namba wan meri jastis bilong PNG, Jastis Cathy Davani long dispela wik.

"Mi sori long harim dai bilong Jastis Catherine Davani long Brisben. Long makim kantri, mi tok tenkyu long Jastis Davani long gutpela wok na sevis biloong em long lukim olsem lo i sanap strong long PNG.

"Tok sori bilong kantri tu i go long man bilong em, John, na ol pikinini bilong ol, na tu, tok tenkyu long em long strongpela eksampel bilong em, moa yet, long givim pawa long ol meri," Mista O'Neill i tok.

Em i tok Jastis Davani i bin mekim kantri praud taim em i bin kamap namba wan meri jas long yia 2001.

"Ol yangpela meri long dispela kantri i ken lukim eksampel bilong em na brukim banis long ol kain hevi long kamap wanem samting ol i laikim long sait bilong wok," Mista O'Neill i tok.

PNG nau i lusim wanpela biknem meri na namba wan jas meri long dispela wik.

Jastis Cathy Davani i gat 56 krismas na i hap Goilala na Rigo long Sentral provins i bin dai long sik kensa long susu, long Mater haus sik long Brisben, Australia long las wik Fonde.

Jastis Davani em i wanpela biknem soka pilai tu husat i makim PNG long ol nesenel na intenesenel soka pilai, na ol pikinini man bilong em tu i bihainim em long pilai soka.

Jas Davani i bin pinisim lo skul long Yunivesiti bilong PNG na Ligel Trening Institut long 1984 na joinim Pablik Solisitas Opis long tupela krismas bipo em i go skul long tupela yia long Sydney, Australia.

Jastis Davani i bin wok wantaim sampela biknem lo kampani insait long PNG olsem Namaliu&Kampani Loyas,



Jastis Catherine Davani

Gadens Ridgeways Loyas, Shepherd Loyas, Blake Dawson Waldron Loyas olsem senia asosiet inap ol i bin mekim em namba wan meri loya bilong PNG i kamap Jastis. Em i bin memba bilong planti

profesenel bodi long kantri tu. Sik kensa i bin daunim Jastis Davani moa long wanpela yia na long las wik Fonde, em i bin dai long Mater Haus sik long Brisben, Australia.



Anda 20 Amerika Nesenel Womens tim i joinim Sanap wantaim kempen long sapotim seif Pot Mosbi long ol mama, ol yangpela meri na ol pikinini meri.

## Tim Amerika U20 Wimens Soka i sapotim ol rait bilong ol PNG meri

OL i kam long pilai long FIFA U-20 Women's Wol Kap bai stat long Mosbi, Nesenel Kapitell Distrik long dispela Sande, Novemba 13, Tim Amerika husat i sempion tripela taim long dispela wol soka kap resis i sapotim ol yut bilong PNG we UN Wimen na NCDC i sapotim ol long mekim Pot Mosbi i seif na nomol long ol meri na ol gel i wokabaut long ol strit, taim ol i kalap long ol bas i go

long skul long ol ples bilong ol. NCD Gavana, Powes parkop, i tok vailens egensim ol meri na ol gel i wanpela samting i kamap long olgeta hap bilong wol, na long edresim dispela long Mosbi, na kamapim nupela sindaun long Mosbi we bai givim sans long ol meri na ol pikinini meri long wokabaut fri, i gat fridom na wankain rait olsem ol man long siti we i seif long olgeta long stap long en.

Tim Kepten bilong Amerika U 20's Wimens, Mallory Pugh i tok long fil, ol bai pilai resis, tasol ol bai sanap wantaim PNG tim na ol narapela U20 women nesenel tim long sapotim ol rait bilong ol meri na gels long stap seif na fri long PNG, Amerika na ol arapela kantri long wol ol i stap long en.

"US U20 Womens Tim i wok long strongim ol meri na ol gel long bihainim na inapim dri-

man bilong ol, i no long Amerika tasol long PNG na ol narapela kantri long wol. Mipela i laikim moa yangpela meri olsem ol memba bilong tim long sanap olsem ol sempion long ol rait bilong ol meri na gel," UN PNG kantri dairekta, Jeffrey Buchanan i tok.

US U20 Womens Tim bai pilaim namba wan gem bilong ol em egensim Frans tim long Mande, Novemba 14.

# PNG LNG putim K1 milien long sanapim helt senta



**EXXONMOBIL PNG Limited, kampani i go pas long PNG LNG Projek, i givim pinis wampela nupela Para sab-Helt senta, haus bilong wokman na wampela embu-**

long kamapim gutpela heltke bilong ol komyuniti i stap klostu long Haidis Ges Kondisening Plent.

Sab helt senta bai gat ples bilong ol sikman i slip na kisim marasin, hap bilong mama karim bebi na long lukautim bebi na mama bihain long karim bebi. Nupela haus bai gat leba wod bilong karim bebi na long lukautim bebi na mama long sampela taim pastaim na bihain ol i ken go long ples. Pastaim long dispela i kamap, ol mama na nupela bebi i save go long ples hariap tasol bihain long karim bebi.

Nupela embulens i gat ol ikwipmen bilong helpim sikman long taim bilong karim hariap i go long haus sik tai save kisim ol siklain long Haidis Ges i go hariap long Tari Haus sik long kamapim heltke program long komyuniti.

Sab helt senta i gat wampela sola pawa yunit long ranim ol ilektrik ikwipmen olsem bikpela vaksin frisa, na long ranim ol wara bilong toilet. Ol opis ikwipmen we PNG LNG i bin givim long dispela nupela opis tu bai ran long dispela sola pawa.

Para Sub-Helt Senta em i stap aninit long Evanjelikal Sios bilong Papua Niugini (ECPNG) aninit long helt sevis divisen bilong en na em i save lukautim moa long 5,000 pipel bilong Haidis, Para na Laite eria.

Nupela helt haus sik nau i senisim olupela sab helt senta haus we i bin stap moa long 30 yia pinis.

ExxonMobil PNG Menesing Dairekta, Andrew Barry i tok Para Sab-Helt Senta i luksave long wanem kain samting inap long kamap taim kampani i wok gut wantaim ol komyuniti. Em i tok senta bai no inap long kamap sapos gutpela hatwok na sapot bilong ECPNG, Haidis Spesel Wok Atoriti, Haidis Ges Dvelopmen Kampani na asples komyuniti i no givim han long wok bung.

Kampani i bin kisim ol asples kontrakta long wokim haus bilong sab-helt senta, long strongim tingting bilong wok na mani i mas stap yet long asples.

ExxonMobil PNG i save putim mani long ol komyuniti projek we i save strongim ikononik gro na kamapim gutpela sindaun

bilong ol Papua Niugini komyuniti.

"I gat stori i soim olsem helt populesen bai wok gut moa long sosel na ikononik gro bilong komyuniti na kantri bilong ol," Mista Barry i tok.

"ExxonMobil PNG em i gat strongpela tingting long invetsim mani long ol saste-nebel helt projek long Papua Niugini long helpim na senisim ol hevi bilong helt we i stap long projek eria," Mista Barry i tok moa.

Helt Seketeri bilong Para Sab-Helt Senta, Keith Kedekai i tok lonpela taim sastenabiliti wantaim pablik patnasip i bikpela samting bilong Para Sab-Helt Senta dvelopmen.

"Mipela tok tenkyu long ExxonMobil PNG na planti komyuniti patna i wok wantaim. Mi laikim ol asples komyuniti i mas lukautim gut ol haus bilong helt sevis long helpim yumi," Mista Kedekai i tok.

Stat long 2014 taim ExxonMobil PNG i kirapim prodaksen em i putim pinis, K27.9 milien long kamapim gutpela helt sevis long ol PNG LNG projek eria long kantri.



**Antap: Ol bikman i sanap long Para Sab-Helt Senta hendova seremoni. Daunbil: Nupela embulens i gat ikwipmen bilong imejensi ExxonMobil givim long Para Sab-Helt senta.**

**lens long Para komyuniti long Hela Provins.** Dvelopmen i soim moa long wan milien kina we PNG LNG i putim i go insait

# ANGAU Haus sik gat nupela operesen tieta na wod

ANGAU Haus sik long Lae, Morobe Provins i kisim wampela nupela operesen tieta na nupela wod wantaim 20 bet bilong ol mama na bebi long bringim lukluk bilong haus sik i go antap moa.

ANGAU haus sik i save lukim klostu long 900 nupela bebi i kamap long wampela mun na dispela nupela hap bilong haus sik bai helpim long katim ol mama long taim bebi i no kam isi na ol mama na pikinini bai kisim gutpela sevis long taim bilong bel mama i laik karim bebi.

Australia Hai Komisina Bruce Davis, i tok Australia, wantaim patna bilong en Papua Niugini i gat bikpela tingting long bringim gutpela heltke long olgeta hap bilong Papua Niugini sitisen. Em i bin toktok long taim bilong opim nupela K4 milien haus

na ol ikwipmen. "Ol nupela hap bilong haus sik em i namba wan hap bilong helpim bilong Australia long givim \$ 207 milien long stretim ANGAU Haus sik.

"ANGAU em i gat bikpela wok long Momase rijon na mi amamas wantaim ol wok we i kamap pinis long dispela taim," Mista Davis i tok.

Nupela tieta i gat hap bilong sikmeri bai slip na wet long kirap, ol wokman na wokmeri na ol sikmeri i gat ol toilet, nes stesin na sterilaisesen rum na wod em i gat ol bet bilong ol sikman long slip, ol tebol na sia, toilet na rum waswas na ples slip bilong wokman na wokmeri.

ANGAU Haus sik Sif Eksektiv Opisa, Dokta Chris Kenyhercz, i tok tenkyu long Australia Gavman long sapos

tim yet haus sik. "Nupela operesen tieta na wod bai helpim long lukautim gut ol sikmeri long haus sik," Dokta i tok.



**Ol bet i stap long nupela wod fasiliti.**

**Ikwipmen insait long operesen tieta na wod bilong ol meri karim.**



**Nesanel Dipatmen ov Helt Seketeri Pascoe Kase na Australia Hai Komisina, Bruce Davis long taim bilong opim nupela dvelopmen bilong haus sik.**





## Yut, Meri na Famili

Pastor Barbara Lunge

### Taim selebresen bilong Tabenakel bilong Mileniel Kingdom

WANPELA sukkah bilong Juda lain. Taim bilong namba 7 taim bilong selebresen mun bilong baibel kalenda, Selebresen bilong ol Tabenakel (Sukkot) i makim taim bilong God bungim kisim bek program bilong em.

Long wan wan yia, taim yumi ritim buk bilong Wok Pris 23:39-43, yumi selebretim festival bilong kamautim kaikai na long amamas long em i save inapim yumi.

Yumi gat ol han bilong diwai bilong Lulav (Wok Pris. 23:40) long 4-pela kona bilong graun, long luksave long lukaut bilong God long mipela na Bikpela olsem King bilong olgeta King husat i stap antap long yumi olgeta.

Narapela bikpela samting long dispela festival bilong yia selebresen long taim yumi wokim ol tripela hap bilong tabenakel (booths, o Sukkot) long wankain han bilong diwai tasol, yumi luksave long gutpela lukaut bilong em long yumi, i kam long wankain han bilong diwai

Ol dispela sukkah o karamap i tokaut olsem wankain olsem ol Israel i bin stap long ples nating, yumi save olsem sefti bilong yumi na gutpela sindaun bilong yumi i kam long God i save lukautim yumi olgeta taim. Wankain olsem David long Buk Song 140:7, yumi tokaut olsem God em i Wanpela man husat em i sukkah bilong yumi (long karamapim yumi) long taim bilong pait.

Amamas olsem Gutpela Samting Bai Kam yet!

Dispela taim bilong amamas insait log yia em i gat bikpela mining long yumi, tasol i gat moa yet bai kam, long Festival bilong Tabenakel i makim moa long wanem samting nau yumi gat na banis bilong yumi.

Sekaraia i tok i go pas pinis olsem long taim bilong Yeshua i stap King long Milenium Kingdom, Festival bilong Tabenakel bai kamap wanpela taim bilong amamas long olgeta yia na ol kantri bai bung long tokaut long BIKPELA em yet i stap olsem as bilong bikpela blesing yumi amamas long en.

"Ol Juda i winim ol birua pinis, orait ol dispela hap lain bilong ol birua i stap yet bai i kam long Jerusalem long olgeta yia. Bikpela i Gat Olgeta Strong bai i stap king bilong ol na ol bai i lotu long em. Na bai ol i bihainim Ol Bikpela De bBilong i Stap Long Haus Win." (Sekaraia 14:16, MEV).

Tok bilong God i tokaut olsem ol kantri bai bung long wanpela de long pait wantaim Jerusalem (Sekaraia 12:1-14; Joel 3:1-2; Ezeiel 38:4). Em i tokim mipela tu olsem yumi no gat tupela tingting long husat tru bai winim dispela pait, bikos em BIKPELA em yet bai pait long helpim ol pipel bilong em. (Sekaraia 14:3).

**Sapos yu laik save moa, yu ken ring long 76238826/79638276**

# Salesien kongrigesen i holim asembli

Pater Ambrose Pereira sbd i raitim

ASEMBLI bilong Salesien Kongrigesen bilong PNG na Solomon Ailan i kisim salens long glasim na skelim mani, pawa na atoriti insait long laip bilong ol.

Pater Albert Lenon sdb Rekto bilong Don Bosco, Tetere, i bin wokim dispela salens long tok skul bilong em insait misa lotu bilong kongrigesen.

Vais provins bilong PNG na Solomon Ailan (PGS) i bin statim Asembli bung bilong em long Novemba 4 na i bin pinis asde, Novemba 9.

"Bikpela wok yum i gat olsem vais provins em long sanapim strongpela faundesen na stiaim provins bilong yumi long raitpela rot," Pater Peter Baquero sbd i bin tok long opim konpens.

Konpens i bin toktok, glasim na skelim ol samting olsem: go hetim Gc27, ovarol provinsal plen, glasim situesen na provinsal dairektori.

Ol i bin givim aut tu ol ID kad na ol dokumen long dispela taim we Pater Angel, Pater Ariel Macatangay sdb na Pater Pedro Sachitula sdb, i bin redim.

Yukaris selebresen i bin givim ol lain long konpens sans long glasim laip na servis ol i givim.

Ripot bilong vais provins i givim piksa long laip na ministri,



Pater Peter i tok tenkyu

situesen na ol salens we ol Salesien kongrigesen long tupela kantri i bungim.

Ol 35 Salesien rilijes i wok long tupela kantri (PNG na SI) long 9-pela haus ol i wokim long kain stail yet bilong ol.

Ol i kam long 14 kantri na ol i gat ol wan wan kalsa na wei bilong wokim ol samting long en. Dispela inap daunim yuniti bilong ol tu.

Ripot i bin tok i gat bikpela nid long plenim ol samting, stap insait long wokim disisen, wok na pre long moa vokesen na nid long fomim ol leiman long wok wantaim na kamapim gut laip



Grup diskasen

na sindaun bilong ol yangpela pipel.

Long nait, Asbisop bilong Pot Mosbi Asdaiosis na Kardinel

John Ribat msc, i bin blesim wanpela haus we ol i pinisim tasol long Don Bosco Taurama.

## Was long Amerika ileksen

I kam long Tablet Niuspepa

WOL i bin wok long was o glasim gut tru 2016 nesanel ileksen kempen long Amerika we i pinis long Tunde na vot i stat.

Tablet i tok dispela em i narapela kain ileksen kempen tru insait long histori bilong Amerika we tupela kendidet i lukim ol samting long narapela wei.

Em i tok dispela ileksen kempen i soim long ples klia ol samting we i brukim Amerika

sosaiti na tu, opim ol i go bikpela moa.

Tablet i tok Konstitusen o Mama Lo bilong Amerika em i wanpela top Mama Lo we i holim na stiaim na givim balens long wok politik insait long tupela senseri o 200 krismas, tasol i luk olsem nau dispela ileksen i abrusim mak na seksekim ol samting i save stap gut.

Bikpela samting long Mama Lo bilong Amerika em separetim ol pawa we em i gat ol rot bilong sekim pawa namel long

eksekutiv, lejisletsa na judiseri.

Ol i mas strong long long kontrolim bagarap i ken kamap long demokrasi na lo.

Bikpela salens em long "taming" o mekim Presiden Donald Trump i wok wantaim ol narapela long Wait Haus we em i ken feil long en.

Sapos Donald Trump i win, dispela bai stat long lida i wokim ol disisen na samting i bihainim laik bilong pipel, na i no long em i pastaim glasim na skelim gut ol samting. Dispela i ken mekim ol samting i go

krankgi (out of control).

Sapos Hilary Clinton i win, dispela i ken kamapim moa hevi long ol samting i go egen-sim em.

Dispela ileksen inap long egensim hap tok we biknem lida bilong Ingran bipo, Winston Churchill, i bin wokim, "Demokrasi em i wos kain gavman, i no ol narapela.

Wanem em i no bin tok long en em, yusim ol tul bilong demokrasi yet long daunim demokrasi.

## Sande skul program i bikpela samting

Sanang Zazoring i raitim

SAMTING olsem 40 Luteran Sande skul tisa i bin greduet i kisim salens long yusim testimoni long Tok bilong Bikpela na lainim gut ol pikinini long spirituel sait na kisim grasia bilong God.

Dairekta bilong Nesanel Sande skul bilong Evanjelikel Luteran Sios husat i bin go pas long trening kos, Reveren Gem-bube Wongege i bin wokim dispela salens na tok ol lo long Buk

Baibel i bosim yumi we ol i mas bihainim long kisim ol gutpela tingting na save i kam long Bikpela.

Em i tok taim ol i save long Tok bilong Bikpela, ol bai save long trupela toktok na kisim salvesen long bilip long Jisas.

Greduesen i bin kamap long Luteran Sios Busu Peris long Oktoba 16.

Hap long ol lain i bin sindaun long tupela wik kos em ol meri na ol i kam long Wampa, Lae na Lae Siti seket.

Lotu we ol i bin selebretim wantaim Santu Komyunio i bin kamap long taim bilong greduesen.

Tok bilong dispela de i bin kam long 2 Timothy 3:14--4:5.

"Save long God i kam long Buk Baibel we God yet i bin giivm save na ol man i bin raitim long sios bilong em-V16-17.":

Olsem yangpela Timothy i bin lainim long Paul na ol aposel, ol i bin strongim ol lain i greduet long painim olgeta risos na gut-

pela save long Buk Baibel.

Reveren Wongege i bin tok Sande Skul program i bikpela samting bikos ol pikinini i liklik yet na ol i lainim Tok bilong God na gutpela pasin na ol toktok ol i lainim bai givim gutpela stia long laip na sindaun bilong ol.

Em i bin tok as we sosaiti i bagarap, sosel injastis, yusim ol drag o spakbrus, ol skul pait na kriminel na bikhet pasin long olgeta level em bikos ol pikinini i no lainim Tok bilong God taim ol i liklik yet.

# Mak bilong nominesen fi i no mas go antap tumas

**NOMINESEN** fi bilong 2017 ne-senel ileksen bai stap long mak bilong K10,000. Gavman i tokaut long dispela nupela fi las wik. Ol i tok as bilong apim mak i go long K10,000 em bikos kost bilong ranim nesanel ileksen i antap tumas na gavman i save spendim bikpela mani tru long taim bilong ileksen.

I gat planti komplek i kamap pinis bihain long praim minista i tokaut long dispela nupela mak.

Tasol em i tingting bilong gavman tasol na bai ol i lusim long lilektoral Komisina long tokaut sapos ol bai sasim dispela nupela nominesen fi o nogat.

I gat gutpela na nogut bilong dispela kain mak bilong nominesen fi. Gavman bai kisim bikpela mani tru long ol kandidate husat i baim fi na putim nem long resis.

Tasol gavman i skelim pinis mani bilong ranim 2017 nesanel ileksen olsem na lilektoral Komisina i no nidim bikpela mani moa long mekim ol wok bilong en.

Bikpela hap tru bilong baset bilong lilektoral Komisina i save go long baim ol wokman ol i kisim long mekim wok bilong nesanel ileksen.

Gavman i tokaut tu olsem ileksen bilong ol provinsal na lokal level gavman bai kamap bihain long nesanel ileksen. Ating i no gat mani bilong ranim dispela ileksen olsem na ol i putim kain bikpela mak long nominesen fi.

Mani ol i kisim long 2017 nomi-



nesen fi bai i go long mekim wok long provinsal na lokal level ileksen.

Sapos gavman i painim mani bilong ranim ileksen, mobeta em i apim fi i go antap long liklik mak tasol. Watpo putim i go antap tru long K10,000?

Plantu manmeri husat i laik resis long 2017 nesanel ileksen bai i

kisim taim sapos gavman i tok orait long K10,000 nominesen fi. Plantu lain husat i laik resis bai i no inap painim kain mani olsem.

Dispela mak bilong mani tu bai i mekim nesanel ileksen i kamap resis bilong ol maniman tasol.

Ol grasrut bai i no gat sans long yusim demokretik rait bilong ol long kontestim nesanel ileksen

bikos plantu bai i no gat kain mani olsem long baim nominesen fi.

Ol politikal pati i wok long bungim mani nau na redi long 2017 ileksen.

Sapos ileksen fi i stap antap olsem ating bai ol i no inap long sapatim sampela gutpela kandidate olsem ol lida meri.

Bikpela komplek i kamap tu

long taim bilong mekim dispela tok save. Watpo na gavman i wet inap 4-pela mun bipo long nesanel ileksen i kamap na em i tokaut long dispela plen bilong en?

Tasol i gat narapela tok tu i stap. Ating sapos mak bilong fi i go antap long K10,000, bai i no gat plantu giaman kandidate husat i go resis long brukim vot tasol. Ol i save ol i no gat sans long win.

Ol i nominet long bagarapim sans bilong ol gutpela kandidate. Long olgeta ileksen kantri i save lukim kain pasin olsem i kamap we sampela ilektoret i save lukim moa long 20 kandidate i resis. Sampela bilong ol bai i tubei sapos mak bilong fi i go antap.

Nesanel ileksen bilong kantri em i bikpela samting.

I mas gat moa pablik dibet long hamas mani gavman i ken makim long nominesen fi.

PNG em i wanpela demokretik kantri na yumi mas givim sans long olgeta lain husat i bilip ol i gutpela man o meri long resis long ileksen.

Olsem na i impoten yumi putim nominesen fi long mak we ol manmeri nating tu i ken baim na resis.

Yumi no ken pasim dua bilong ol kandidate husat i ken kamap ol gutpela memba bilong ol pipel bilong ilektoret na bilong kantri tu.

## Yunaited Sios i kisim helpim

United Sios long Ariaka ples long Upper Wage LLG long Komo-Margarima distrik bilong Hela Provins i kisim K1,000 helpim i kam long wanpela lenona lida.

Andy Hamaga bilong Hides Petroleum Developmen Laisens (PDL) 8 long bilong PNG LNG Projek i givim K1,000 long United Sios long Ariaka.

Dispela mani bai helpim ol manmeri Ariaka i mekim ol mentenens wok long dispela sios bilong ol.

United Sios long Ariaka i no gat haus kapa na ol nupela samting.

Ol manmeri long hap i laik kirapim nupela haus na mekim haus kapa.

Lokal komyuniti lida Paul Agiru, i tok tenkyu long Mista Hamaga long givim dispela donesen mani.

Mista Agiru i tok ol bai



Mista Agiru (lephan) i kisim deposit risit long Mista Hamaga.

yusim dispela mani long baim ol nupela samting olsem kapa na nil long kirapim nupela haus kapa bilong olpela haus lotu.

"Mi makim maus bilong ol pipel long ples na tok tenkyu long Mista Hamaga i givim dispela helpim. Dispela mani bai go long baim ol nupela samting long kriapim nupela haus kapa bilong sios bilong mipela long ples Ariaka," Mista Agiru i tok.

Mista Hamaga i putim dispela K1,000 i go insait long benk akaun bilong United Sios Panduaga Circuit long Mande long dispela wik long Pot Mosbi.

Published Weekly, Thursday, for Word Publishing Company, Ltd.

P.O. Box 1982, Boroko, NCD  
Papua New Guinea

Telephone: (675) 325 2500

Fax: (675) 325 2579

Email: [editorial@wantokniuspepa.com](mailto:editorial@wantokniuspepa.com)

Pe bilong wanpela yia  
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager  
Elizabeth Konga

Editor  
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

# Ikonomik analisis kos bai helpim long glasim na skelim ol polisi

## ...31 i greduet long NRI trening kos

Veronica Hatutasi i raitim

**IKONOMIK** Polisi Analisis trening kos (EPAC) we PNG Nesanel Risets Institut (PNG NRI) i save rranim olgeta yia i save helpim gut planti woka long gavman, praiwet sekta, ol plena, ol edministeta, ol politikel lida, ol midia lain na ol risetsa long save na glasim na skelim ol samting i karamapim fainens, mani na ikonomiks bilong kantri.

Dispela EPAC trening kos em i wanpela strongpela trening program bilong NRI na 27 yia bihain long taim ol i bin kirapim dispela program long yia 1989, samting olsem 500 man na meri i greduet pinis na nau ol i helpim ol dipatmen na ogenaesen bilong ol.

Namba 26 greduesen we i bin kamap long Sarere Oktoba 31 long NRI we 31 man na meri long ol ki gavman ejensi na ol stet atoriti, ol provincaal edministreta na plena na long praiwet sekta i pinisim 6-pela wik kos na i kisim setifiket bilong ol.

Ol kos we ol i bin karamapim insait long 6-pela wik em long developmen plening, fiscal na moniteri polisi, len na naturel risos developmen, ol maket, kompetisen o resis na intenesenel tred.

Ol kos kodineta na senia leksera long NRI na ol ausait leksera, wanpela i bilong Yunivesiti bilong Kwinslan. I bin gat ol spika i kamap long trening kos long Puma Enej na PNG Mejistiriel sevis husat i bin serim ol ekspirisen long ol samting i kamap long kos.

"Dispela EPAC program i givim gutpela sans long oil lain i sindaun long kos long kisim nupela na gutpela save long ol bikipela ikonomik na pablik polisi we i sut long nesanel developmen bilong dispela kantri," dairekta bilong NRI, Dokta Charles Yala i bin tok.

Dokta Yala i tok wanpela long ol rikwaiamen bilong dispela kos em long lainim long karimaut risets wok, glasim na skelim na raitim gutpela polisi pepa long ol bikipela samting i karamapim kantri.

Em i tok hap bilong glasim na skelim i helpim ol lain i bin sindaun long dispela kos long wok bilong ol na long pinis bilong kos, raitim wanpela polisi pepa long wanpela samting na em i gat ol hap bilong risets, glasim na skelim na raitim polisi pepa.

Em i tok ol midel i go long senia level profesenel/menesa long pablik na praiwet sekta i save sindaun long dispela EPAC trening kos. Spika long greduesen em namba



2-Daks bilong EPAC 2016 trening kos, Eileen Saiyomina bilong Nesanel Plening Dipatmen i kisim setifiket long Sir Mekere Morauta.

6 praim minista bilong PNG na papa bilong ol rifom na man i wokim bikipela kontribusen long politikel na sosel developmen long kantri, Sir Mekere Morauta.

Em i bin tokim ol lain i greduet long diskas o toktok long ol samting, glasim na skelim na askim planti kwesten long ol salens i karamapim yumi, na sanapim strongpela faundesen long gro.

"Yupela olgeta i lida long eria na ogenaesen yupela i wok long en, holim ol bikipela wok na yupela i

stap long posisen bilong givim edvais long mekim polisi. Mi strongim yupela long go insait long pablik na risponsibel sosel midia i dibet long ol ikonomik polisi isu. Taim ol PNG lain yet i toktok long ol feks na ol i diskasim ol samting long ples klia na autim stret ol tingting bilong ol, bai yumi daunim ol salens yumi gat na sanapim strongpela faundesen bilong gro.

"No ken tok yesa tasol long ol samting, tasol glasim na skelim na askim kwesten long rot we yumi

ken wokim ol samting moa gut," Sir Mekere i bin tokim ol lain i greduet.

Sir Mekere i bin tok rifom o senis inap kamap sapos kantri i bungim ikonomik hevi, tasol praim minista i mas go pas long ol senis long trupela senis i kamap.

Em i tok taim em i bin praim minista long tripela yia tasol stat long 1999, ol hevi long ikonomi i bin stap na em i bin kamapim rifom o senis long ol eria bilong fainensel sekta, pablik entaprais

na kompetisen polisi.

Sir Mekere i tok gavman i mas tromoim moa mani long stopim "recession" o wok ikonomi i go daun na go bagarap.

Em i tok long nau, mak long mani kantri i wok long kisim i kam insait i go daun long mak i bin stap long 2006, na long gavman i kisim moa dinau na prinim moa Kina i no gutpela rot.

Em i tok i moabeta long gavman i putim moa mani long ol projek na wok long ol sekta bai kamapim mani na ikonomi bai gro, na tu, ol ikonomik infrastraksa na ol sevis olsem helt na edukesen.

Em i tok gavman i mas no ken westim bikipela mani long hostim ol bikipela intenesenel konpres bikos kos i antap tumas, na mani we gavman inap yusim long divelopmen na ol sevis long kantri.

Long makim ol lain i greduet, Esther Mann i bin tok tenkyu i go long NRI long kamapim dispela kos we i givim ol sumatin gutpela save long ol ki ikonomik na pablik polisi, na bai helpim ol long wok bilong ol.

Em i bin tromoim salens i go long ol wanlain greduet long serim na go hetim ol save samting we ol i bin lainim long dispela EPAC trening kos.

Ellen Saiyomina em wanpela yangpela meri bilong Nesanel Plening i bin wokim gut long ol 31 pipel i sindaun long kos na i bin kisim daks awod.



Ol lain i bin stap long namba 26 NRI EPAC kos greduesen

# Madang taun maket no gat spes bilong asples mama



Wanpela geit bilong nupela Madang taun maket

James G. Kila i raitim

**OL KOMYUNITI lida long Madang i no wanbel olsem ol asples mama bilong Madang stret i no save kisim gutpela spes long salim fres kaikai insait long nupela Madang taun maket.**

Pastaim egrikalsa koles leksera na wanpela asples man bilong Sisiak viles insait long Madang taun, Aldam Bande, i tok lain husat i menesim nupela Madang taun maket, em Madang Eben Lokal Level gavman (MULLG) i mas givim moa luksave long ol asples mama na givim spes long ol insait long maket.

Nupela Madang taun maket em gavman bilong Japan aninit long Japan Intenesenel Kopresen Ejensi (JICA) wantaim Nesenel Fiseris Atoriti (NFA) i bin putim K26 milien long wokim.

Ol i bin opim dispela nupela maket long Ogas 1, 2016 na maket i no bin opim dua bilong en hariap bikos long planti kain kain toktok long husat bai menesim maket. Bihain long wanpela mun, maket i op taim Madang provinsal edministresen i givim ki i go long han bilong MULLG.

Tude, planti asples Madang lain bilong salim kaikai i no save amamas taim ol i lukim olsem planti spes insait long maket em ol lain bilong salim kaikai bilong hailans rijon i kisim bikipela spes.

"Sapos yu asples man o meri bilong Madang provins stret bai yu wari na sori taim yu lukim ol mama bilong Madang i sindaun long hot san na salim kaikai bilong ol long simen insait long nupela Madang taun maket." Bande i tok.

"Taim ol dispela asples mama i sindaun salim kaikai long simen ausait long haus, ol lain bilong arapela provins i sindaun gut stret aninit long haus kapa na salim kaikai bilong ol antap long tebol o simen spes ol wokim long lainim ol kaikai," em i tok.

Planti ol asples mama bilong Madang i no amamas na i autim bel hevi bilong ol olsem ol no save kisim gutpela spes insait long nupela Madang taun maket long salim ol fres

kaikai bilong ol.

Wanpela LLG wod kaunsila bilong Madang i tokaut olsem ol lain bilong hailans rijon i save go pas na kisim ol fom o simen na lainim ol kaikai bilong ol, na ol asples mama i save go bihain na lainim ol fres kaikai bilong ol long simen tasol.

Ruth Tolom wanpela mama bilong ples Bugati, i tokim Wantok Niuspepa olsem Madang Eben lokal level gavman (MULLG), husat i go pas long lukautim nupela Madang taun maket i mas givim spes o eria long ol asples mama bilong Madang stret i salim kaikai.

Tolom i tok planti taim ol asples Madang mama i save kam bihain liklik long taun bikos ples bilong ol i stap longwe. Olsem na moabeta, MULLG i mas makim spes we ol asples mama yet i ken go na salim kaikai, maski olsem ol kam bihain.

Em i tok olsem planti taim ol lain bilong hailans husat i save karim ol kaukau beg, kabis, kerot na ol kumu bilong hailans i save go slip arere long ol stua long taun na stap, na taim geit bilong maket i op, wantu tru ol i save go insait long kisim spes.

"Dispela kain pasin ol hailans lain i mekim i mas stop, na ol MULLG maket atoriti lain i mas tok save long ol olsem wanem spes em bilong ol asples Madang mama long salim kaikai na wanem spes em bilong ol lain hailans lain i ken salim kaikai bilong ol," Tolom i tok.


Bande, husat em i wanpela papa-graun bilong sampela eria long Madang taun i no amamas tumas tu long dispela pasin.

"Ol i wokim dispela maket em long helpim ol pipel bilong Madang na ol asples mama i mas gat moa luksave i kam long MULLG na ol menesmen bilong maket,


"Maket i no bilong ol ausait lain bilong arapela provins husat i kam long Madang long kisim mani na go aut. Em maket bilong Madang na maket atoriti mas givim moa luksave long ol asples maket lain," Bande i tok.



Ol mama bilong Madang i salim ol fres kaikai long simen na haitim ol yet long ambrela



**PAPUA NEW GUINEA  
SUPREME COURT & NATIONAL COURT  
OFFICE OF THE CHIEF JUSTICE**





## FUNERAL PROGRAM

The Office of the Chief Justice announces the funeral arrangements for the late Justice Catherine Davani, CSM, that has been put together in consultation with the family of the late judge.

The programme is as follows:

- \* Thursday 10th November 2016**  
- 1:30pm Arrival of casket on board PX 004 from Brisbane Australia.  
Casket taken to Funeral Home at Erima
- \* Friday 11th November 2016 to Sunday 13th November 2016**  
Haus Krai at the Davani Family Residence  
Sect. 124 Lot 42 Laurabada Avenue, 3 mile, NCD
- \* Monday 14th November 2016**  
- 9:00am – 10:30am  
Ceremonial Sitting of the Supreme Court at Waigani
- 11:00am – 1:00pm  
Funeral Service to be held at the St. Joseph's Catholic Church East Boroko, NCD


Further information can be obtained from the following officers and contact numbers;  
324 5700, 5782, 5812, 5770 Ms. Joanna Tupou, Mr. Nigel Tavatuna and Mr. Murray Mathew

**Toro**



**Biabia**



**Kanage**



Teks i kam long 71845906

Dia Edita,  
Mi no save wanbel long wanpela samting insait long Wantok Niuspepa na nau mi autim. Nau long Inglis niuspepa ol i no save putim Tok Pisin nius long sampela pes insait long pepa bilong ol, na long Wantok Niuspepa sampela pes insait em yupela i raitim long Tok Inglis. Em mi no save amamas long dispela na mi autim. Mi tok olsem long wanem mi man bilong ritim Wantok Niuspepa long olgeta wik long Fonde. Tenkyu tru,

Mi Wantok rida.  
Wapu MK NCD

Dia Edita,  
Mi gat wanpela bel hevi i stap na mi laik autim na ol lida bilong yumi i ken lukim na helpim mipela ol liklik grasrut pipel.  
Nau yet yumi PNG i gat inap oil, ges, gol, kopa, timba na planti bikipela kampani na kongkong i kam pulap wokim bisnis na karim mani bilong PNG i go aut.  
Wari bilong mi i olsem, dispela ol kampani i peim ol wokman long K250, K300 tasol. Dispela em i no inap long lukautim famili insait long tupela wik. Labour Dipatmen plis mipela ol ru tru pipel na wantok bilong yupela. Plis mipela i kisim bikipela bagarap ya... PLIS HELPIM MIPELA!

J Aina, Gerehu Stage 7

3- Dia Edita,  
MI no save husat tru bai mekim samting long stretim dispela wari mi gat long en.  
Ausait long Boroko namel long Stop n Shop na Pos Ofis, bikipela nois long musik i save pairap no gut tru long olgeta wok de.  
Ples we bikipela nois long musikl pairap i gat Digicel tebol we ol i salim ol telepon na ol arapela prodak bilong Digicel long en. I mas promosen bilong Digicel ol i wokim long hap, tasol ol i wokim bikipela nois tumas. Ating yau bilong ol opis na bisnis i stap long dispela eria i mas pas na ol i no save les long nois polusen. Plis sampela lain i gat atoriti, mekim samting long kontrolim o stopim dispela bikipela nois i pairap krangki tru.

Boroko Daihat  
4 Mail  
NCD



Katun bilong Donald Trump i kam long intanet. Planti i ting olsem em bai lus na Hillary Clinton bai win. Tasolol dispela toktok i tanimbek we Trump i kamap Presiden bilong Amerika.

**Gavana bilong Hela i go long ol bus ples**

Timon Henry i raitim  
NUPELA Gavana bilong Hela Provins, Francis Potape i bin wokim ol lukluk raun i go long ol rurel ples bilong Hela we i stap longwe long ol taun na ol bikipela gavman sevis i no long-taim i go pinis.  
Wanpela bung i bin kamap long painim mani long wokim haus bilong et pos Komyuniti Helt Woka (APO) haus ol i bin sanapim long 1964 haus.  
Gavana Potape i bin go long dispela hap na givim mani mak long olsem wan handet tausen K100,000.00 long wokim haus bilong helt woka long sevim pipel.  
Long dispela taim tu


em i givim K100,000 long Kunduku Tapaija na Kipongo skul na K50,000 bilong wokim haus bilong Etpos odeli o helt woka.  
Insait long dispela de tu em i tokaut olsem rot bai stretim long Haite Hiwanda i go pinis long Kunduku na Koroba ste-sen aninit long nem bilong Daniel Mapiria Haiwe.  
Bihain long ol i harim wok plen bilong em tausen manmeri i bin singaut "eksen Gavana wanbel stap wantaim yu."  
Insait long dispela bung planti bilong ol lida bilong sios, ol yut, meri pablik sevens i bin witnesim kibung.



Gavana Francis Potape i go raun long ol rurel ples long Hela Provins. Foto: Timon Henry.



Em nau! Ol pikinini i ken painim rot i go long ples wantaim Wantok lain...



STORI BILONG TUMBUNA

PIKININI MAN I KAMAP WANPIS

Wanpela man i gat tupela meri. Ol i stap long bus na ol i planim kaukau na suga na ol kain kain kaikai na ol i stap gut long dispela hap bus. Dispela hap bus, ol i kolim Tutos, ol i stap long dispela ples.

Wanpela taim man i harim long narapela ples ol i kolim Tabires, long dispela ples ol i kilim pik na man i stap long Tutos, em i laik i go kaikai pik long Tabires. Na em i brukim paiawut na i putim long haus. Na tupela meri wantaim i gat bel na man i tokim tupela olsem: "Yutupela i karim pikinini meri, orait, em bilong mi. Yutupela i lukautim gut i stap. Sapos pikinini man orait, em yutupela i kilim na tromoi i go long hul. Em mi no laik. Man i tok olsem na em i go kaikai pik long Tabires. Na tupela meri i stap long haus na wanpela meri i karim pikinini meri na narapela i karim pikinini man.



Mama bilong pikinini man i tok, susa, mi karim pikinini man na mi bai kilim o mi mekim wanem, na mama bilong pikinini meri i tok, nogat. Dispela pikinini meri em i bilong man bilong mitupela, em bai i go marit na em i no inap helpim mitupela long brukim paiawut o wokim samting. Dispela pikinini man tasol bai helpim mitupela. Mama bilong pikinini meri i tok olsem long mama bilong pikinini man.

pikinini meri tasol. Em i givim hap pik long tupela na ol i kaikai. Na meri i lukim susa i no kaikai pik na em i givim tupela i kaikai.

Ol i slip na biknait tru long 12 klok samting, papa i kirap na lukim boi i slip pinis na isi tasol, papa i kirapim tupela mama na pikinini meri. Ol i lusim boi ya na ol i go long narapela ples. Dispela ples ol i kolim Liogtes, ol i go long dispela hap long biknait tru. Ol i kirap na ol i go. Boi i ting ol i slip em i no save olsem na em i slip.

Orait, em i harim tok bilong susa na em i no kilim pikinini bilong em. Tupela i stap na man i no kam kwik long haus na tupela pikinini i kamap bikpela na tupela i wokabout long graun na man i no kam bek long haus na tupela pikinini i kamap bikpela na pikinini em i brukim paiawut na lukautim gut ol, tupela mama na susa tu.

Long moning em i kirap na i lukim ol i na slip long bet bilong ol. Ol i go pinis, em i no save ol i go we tru. Em i tingting planti na em i krai i stap long haus na san i kamap antap 8 klok samting em i go ausait na i krai i stap na wanpela tarangau ya i sori long em na em i raun i go long graun.

Pikinini meri em i wok long kamautim kaukau na kukim na givim long brata na tupela mama. Bihain papa i kam na em i kros long pikinini man. Na mi tokim pinis na mi go, bilong wanem, yutupela i no harim tok bilong mi.

Na tarangau i askim dispela boi, bilong wanem yu krai i stap na boi i tok papa wantaim tupela mama na susa, ol i lusim mi na ol i go long narapela hap mi no save na mi krai i stap. Orait, pinis taragau i tok yu i no ken krai mi ken helpim yu.

Em i kros nogut tru. Na em i no givim pik long pikinini boi, emi givim pik long pikinini meri tasol na em i no givim pik long mama bilong dispela boi tu. Em i givim pik long mama bilong

Orait dispela pisin i raun i go long sampela hap na em i kisim wanpela pik mama i gat bel. Tarangau i kisim na i givim long boi na pik i karim 12-pela pikinini olgeta. Dispela tarangau i helpim boi na em i stap gut long han bilong taragau.

Tarangau i helpim em na em i no tingting moa long papamama na susa. Em tasol.

PAINIM WOD PILAI

Ol wod lista:


- TEWEL
WOKSAP
TUPELA
MALARI
OGAS
FRAIDE
AUPA

- BAUTIM
GRISIM
HAPAP
PANIM
SPOILIM
VIRUA
TULAIT

- SWIMIM
SINGIM
PARAM
LONGWE
KIKBAL
GRAS
PISLAIN

A large grid of letters for a word search puzzle.

Ansa bilong Wod Pilai isu 2199





# TOK PISIN NEWS

from Radio Australia  
radioaustralia.net.au

Harim TOK PISIN long  
Radio Australia  
**101.9FM**  
Port Moresby

Tok Pisin Service	
6am - 7am	6080; 7240(KHZ)
7pm - 9pm	5995; 6020; 9710; 1280(KHZ)

## PNG seks lo

Caroline Tiriman i raitim

**PLANTI toktok kros i wok long kamap long Papua Niuginii bihainim tingting bilong larim wok bilong prostitution o Pamuk pasin i kamap lo.**

Ol memba bilong Palamen nau i wok long lukluk long dispela tingting long Palamen, bihainim askim bilong

memba bilong Sumkar long Madang Provins, Ken Feawether i bin putim dispela tingting long Praivet membas bilong las wik.

Praim Minista Peter O'Neill na sampela narapela memba olsem Gavan bilong Oro provins, Gary Juffa i no sapotim dispela tingting.

Ol ripot i tok tu olsem Minista bilong Pablik Sevis, ,

Dokta Puka Temu i wanbel long larim prostitusen i stap aninit long lo.

Cathy Ketepa husat i go pas long Friends Frangipani, na i lukautim ol seks woka long PNG i tokim Redio Australia olsem sapos Palamen i oraitim dispela lo, em bai helpim gut ol seks woka na tu, ol pipel i save yusim ol seks woka long sait bilong helt.

## Vanuatu egrikalsa na Turisam Festival

Caroline Tiriman i raitim

OL lain bilong Egrikalsa na Turisim bisnis long Vanuatu bai holim tripela de Egrikalsa na Turisim Festival em i bin stat tude long Port Vila na bai pinis long Fraide.

As tingting bilong dispela

festival em bilong soim ol gutpela samting em ol fama, na ol turis bisnis i save mekim long helpim dispela tupela industri i kamap strong na helpim ikonimi bilong kantri.

Dispela em i namba wan taim bilong holim kain festival olsem long Vanuatu.

Festival ya bai lukim ol Chef o ol save man long kukim ol kaikai long ol Hotel, na ol resttron i yusim ol lokal o asples kaikai na tu, ol pis long dispela festival.

Dairekta Jeneral bilong Ministri ov Egrikalsa, Laipstok, Forestri, Fiseris na Baiosekyuriti long Vanuatu.



Ol Ni-Vanuatu i bilas wantaim ol kastom samting.

## PNG poto jenelis meri i promotim PNG long sosal midia

Caroline Tirimani raitim

WANPELA yangpela poto jenelis bilong Madang Provins i bin wok long pulim planti pipel wantaim ol poto bilong PNG long sosal midia.

Mel Tatut husat i bin greduet long jenelism long Divine Word University i no long taim i go pinis i gat pes bilong en long Face Book em i kolim long "Niugini Photograph".

Ol poto em Mel i save kisim i karamapim ol samting olsem ol pipel, ol nambis, ol mauten, ol ailan, ol kalsa, ol solwara na planti ol narapla samting.

Em i tok tu olsem ol piksa



Mel Tatut, wanpela PNG poto jenelis.

bilong en i soim olsem PNG i gat planti ol gutpela samting

ing em i narakain long ol narapela kantri long wol.

## 44 tausen pipel i no stap moa long PNG ples



Caroline Tiriman i raitim

INTENESENEL Ogenaisesen bilong Maignesen i tok i tok PNG i gat samting olsem 44,000 pipel displace o i no stap moa long ol ples bilong ol.

Em i tok tok dispela namba long wanpela ripot em ol i bin autim long wik i go pinis, we ol i tok dispela

namba i no karamapim ol refuji na asailam sika long Manus Ailan, o ol refuji bilong Wes Papua.

Ursula Rakova, meri i go pas long Tulele Peisa we i wok long helpim ol pipel bilong en long lusim Caterets Ailan long go long bikples Bogenvil i tok gavman bilong PNG na Atonomas Rijon bilong Bogenvil i mas bihainim

Lotu Katolik long Bogenvil - na helpim ol Atol pipel olsem Caterets na Mortlocks husat i wokl ong kisim taim long Klaimet Senis.

Mis Rakova i tok ol i no laik lusim ples bilong ol, tasol ol solwara i ranim ol na em i askim dispela tupela gavman long luksave long wari bilong ol na givim sampela helpim.

## Juffa i tok 2017 PNG baset bai helpim tasol ol ris pipel

Caroline Tiriman i raitim

GAVANA bilong Oro Provins i sutim tok long gavman olsem 2017 baset we ol i bin tokaut long en long dispela wik bai mekim ol pua pipel i kisim taim moa yet, taim ol ris pipel bai amamas long en.

Gavman i katim mani em i save yusim long lukautim wok iblong en long helt na edukesen, na em i apim ol takis em ol pipel i mas baim.

Dispela em laspela baset bilong gavman pastaim long 2017 nesenele ileksen. Ol i tok gavman i mekim dispela bilong traime daunim bikpela

wari bilong ikonimi.

Mista Juffa i tok, planti bikpela bisnis kampani i no save baim takis, na gavman i mas mekim ol dispela kampani i baim takis na i no putim moa takis long ol pipel we i kisim taim pinis long olgeta hevi long sait long ikonimi.



Gavana Gary Juffa na ol pikinini bilong Awala long tumbuna bilas.

# Saina stopim ol pro-demokresi lain long Hong Kong

**BIKEPELA protes i wok long kamap long Hong Kong bihain long Saina i stopim tupela pro-demokresi politisen long holim wok bilong kaunsil bihain long ol i bin win long ileksen long mun Septemba.**

Gavman bilong Saina i tokaut olsem Yau Wai-ching wantaim Sixtus "Baggio" Leung bai i no inap long holim wok bilong politiks. Dispela toktok bilong Saina i mekim ol lain bilong Hong Kong husat i laik ol yet i bosim ol samting, i belhat.

Dispela oda bilong Saina i strong tru na em i namba

wan taim long gavman bilong Saina i mekim dispela kain lo bihain long em i kisim bek Hong Kong long Briten long 1997.

Ol ripot i tok bai i gat moa protes i kamap long Hong Kong bikos ol pipel i no wanbel long dispela pasin Saina i bin mekim.

Saina i bin rausim Yau wantaim Leung long stap insait long politiks bikos las mun long taim ol memba i mekim promis, tupela i no laik promis long wok aninit long Saina. Tupela i bin karim blupela plak i tok: Hong Kong is not China."

Bihain long dispela, Saina i tok ol i no kaunim tok promis bilong tupela man ya na bai ol i no inap long mekim promis gen.

Lo bilong Saina i tok sapos wanpela man long Hong Kong i laik resis long wok bilong kaunsil o ol arapela politikal wok, em i mas mekim promis long wok aninit long gavman bilong Saina.

I gat planti pipel husat i laik Hong Kong i mas stap independen, tasol Saina i no laik. Husat lain i singaut long kamap independen i brukim dispela lo bilong Saina na ol

i ken kisim mekim save long gavman bilong Saina.

Emily Lau, wanpela strongpela lida bilong pro-demokresi long Hong Kong i tok Saina i pret long larim ol tupela man ya i holim wok bilong kaunsil bikos moa singaut i wok long kamap long ol arapela hap bilong Saina olsem, Tibet na Xinjiang we ol pipel i no laik komunis gavman bilong Saina.

Em i tok dispela pasin Saina i mekim bai i no inap long stopim moa singaut bilong ol Hong Kong pipel long stap independen long Saina.

Lau husait i siameri bilong

Demokretik Pati bilong Hong Kong i tok maski Saina i stopim Yau wantaim Leung, i gat moa studen long ol sekenderi skul na ol yunivesiti husat i sapatim tingting bilong stap independen long Saina.

Em i tok mobeta Saina i mas askim em yet, "Watpo na ol yangpela pipel – na ol dispela husat i no yanpela tumas, i wok long tingting long bruk lusim Saina?"

Em i tok sapos Saina i luksave na askim na painim ansa, ating bai i gat rot bilong stretim dispela hevi, bikos pasin bilong yusim

strongpela lo long stopim ol pipel bai i mekim ol i belhat moa yet na kamapim moa trabel long Hong Kong.

Bihain long Briten i bin givim Hong Kong i go bek long Saina long 1997, ol pipel bilong Hong Kong i bin gat ol lo na na kot na fridom em ol arapela hap long bikples i no gat. I bin gat "wanpela kantri, tupela sistem" Tasol tude ol pipel bilong Hong Kong i tok Saina i wok long isi isi long sensim ol dispela lo we long 2014 i bin gat bikpela protes tru, "umbrella revolution" i bin kamap inap long tripela mun.

## Ol Kurdish fos i kamap klostu long Mosul

OL Iraq Kurdish soldia i pait strong egensim ol lain militen long taim ol i go insait long wanpela taun ol lain bilong Islamik Stet i holim long saut-is Mosul. Na ol soldia husat i go insait long saut hap bilong siti i painim matmat we i gat samting olsem 100 bodi ol Islamik Stet i bin katim het bilong ol.

Ol i pait long kisim bek Bashiga taun long han bilong Isis long Mosul, namba tu bikpela siti bilong Iraq, na helpim ol pipel husat i bin stap aninit long Isis inap tupela yia.

Ol ripot i tok long taim Isis i bin kisim ol dispela taun long 2014, ol i bin kilim planti ol manmeri. Ol i bin putim ol piksa bilong dispela pasin ol i wokim long sosel media we ol pipel i ken lukim.

Long Mande ol soldia bilong Iraq i go insait long Hamam al-

Alil long saut hap bilong Mosul na ol i painim wanpela bikpela hul i gat planti bun bilong man long en.

Planti pipel bilong Bashiq i ranawe pinis na ol lain bilong Isis tasol i stap. Dispela taun i stap not-is na 13 mail longwe long Mosul siti.

Ol soldia bilong Iraq na ol Kurdish em USA i sapatim i bung wantaim sampela militen em gavman i tok orait long ol, i wok long pait wantaim ol Isis nau long rausim ol long Mosul.

Wanpela mausman bilong ami i tok long Mande olsem ol soldia bilong Iraq i kisim bek Hamam al-Alil na ol i salim piksa i go aut i soim ol i apim plak bilong Iraq antap long ruf bilong haus long dispela taun.

Ol soldia i wok long go insait isi isi bikos sampela lain bilong Isis i hait i stap na i wok long pairapim ol bom long ol trep i stap long kar.



Ol man i wet long ol lain i sekap long ID bilong ol bihain long ol i ranawe lusim Mosul long Iraq.

## Smok i bagarapim Delhi

GAVMAN bilong India i tok i gat imejensi long Nu Delhi bikos poisin smok i bagarapim tru siti. Na gavman i tokaut bai ol i pasim ol konstraksen ples na ol pawa stesin i save yusim koul (coal) long sotpela taim long traime bringim mak bilong smok i kam daun.

Ol skul bai i pas inap tripela de na bai ol i skelim ol de we ol kar inap ran long rot. Inap 6-pela de, level bilong poisin smok i bin stap antap tru long Delhi na i winim mak bilong ol masin bilong skelim poisin long win.

Ol save lain i tok level bilong ol PM2 poisin i winim mak bilong 999 long sampela hap bilong siti long dispela wik. Dispela poisin i strong tru na i ken go insait long ples bilong pulim win

na long blut i go long kru bilong man.

Long Sande, sif minista bilong Delhi, Arvind Kejriwal, i tok ol dispela imejensi operesen i kamap bikos ol i wari long helt bilong ol pipel. Em i tokim ol pipel long stap long haus na i no ken go raun nabaut.

Ol i stopim ol konstraksen na ples bilong kukim pipia inap 5-pela de bikos ol dispela eria i save kamapim planti poisin smok. Ol bulldosa i wok long karamapim ol ples bilong kukim pipia long stopim moa smok.

Ol i stopim wanpela koul pawa stesin long Badarpur, saut-is Delhi, long stop wok inap long 10-pela de, wantaim ol disel jenereta long siti Kejriwal i askim ol arapela stet tu long putim lo bilong stopim ol lain i kukim ol



Ol yangpela rana i ran long Nu Delhi 10 kilomita resis long Sande.

pipia bilong egrikalsa

Olgeta yia long dispela taim, planti tausen ol fama long Haryana na Punjab i save kukim gaden bilong ol

long klinim ol pipia na dispela i save kamapim bikpela smok tru i go antap long skai long noten hap bilong India.

Ol haus sik long siti i tok

long dispela taim ol i save lukim planti moa pipel i gat sik long pulim win. Planti bilong ol dispela lain em ol pikinini.

Wanpela stadi long 2015 i painim olsem 4.4milien skul pikinini i gat hevi long pulim win na bai helt bilong ol i no inap kamap gut.

# Minista Tomscoll salensim ol nupela CIC dairekta

**James G. Kila i raitim**

**EGRIKALSA** Minista, Tommy Asik Tomscoll i givim strong-pela salens i go long ol nupela bod ov dairekta bilong Kopi Industri Kopresen olsem ol i mas sevim intres bilong ol lain ol i makim ol na holim strong ol veliu na visin bilong kopi industri.

Mista Tomscoll i givim dispela salens las wik Fraide long Goroka, Isten Hailans provins taim 8-pela long 12-pela bod ov dairekta bilong CIC i givim tok promis bilong ol long mejistret bilong Goroka Distrik Kot, Gerald Vetunawa.

Ol dispela nupela CIC bod ov dairekta em Nesanel Eksekutiv Kaunsil (NEC) i

makim ol long sevim ol stekholda long kopi industri.

Insait long wanpela ripot dispela niuspepa i kisim, Sif Eksekutiv Opisa (CEO) bilong CIC, Charlies Dambui i tokaut olsem namel long 12-pela lain insait long bod, 8-pela long ol em ol nupela memba em Mejistret Vetunawa i lukim ol i sainim tok promis.

Ol lain i mekim tok promis em Joseph Kom, husat i makim Simbu smolholda kopi groas asosiesen (SHCGA), Jerry Anisi (Momase SHCGA), Patrick Komba (Enga na arapela provins SHCGA), Gad Wamiri (Plantasin na proses asosiesen), Nichola Ello (Isten Hailans SHCGA), Henry Ame (Ekspotas Kaunsil).

Foapela arapela dairekta

husat i no givim tok promis long las wik Fraide em Jack Kulam, husat i makim Westen Hailans SHCGA, Peter Hawi (Sauten rijon SHCGA), opisa o man makim Dipatmen ov Tred, Komes na Industri na wanpela i makim seketeri bilong Dipatmen ov Treseri.

Sampela long ol dispela lain em ol olpela pes insait long CIC bod long pastaim na sampela em ol nupela, tasol bikpela samting em olsem dispela ol lain i mas sevim intres bilong wanem lain ol i makim insait long bod. Ol no ken tingim intres bilong ol yet, ol bai toktok strong long gutpela bilong industri we i save sevim planti milien kopi groa insait long PNG.

## Namba bilong seavings akaun i go antap

PLANTI manameri i wok long lukim olsem pasin bilong sevim mani em i gutpela pasin na dispela i lukim namba bilong seavings akaun long Bank South Pacific i go antap, Sif Eksekutiv Opisa (CEO), Robin Fleming, i tok.

Mista Fleming i tok nupela seavings akaun prodak bilong BSP olsem Plus Saver na Kids Savings i lukim moa long 270,000 nupela kastoma i opim dispela tupela seavings akaun.

Mista Fleming i tok dis-

pela tupela akaun em i no gat fi bilong em, em i fri long opim na BSP i givim sans long ol manmeri na pikinini long sevim mani long benk.

“Gutpela bilong dispela em olsem BSP i lukim moa long K170 milien i go insait long dispela ol akaun,” Mista Fleming i tok.

Em i tok BSP i putim i go pas ol investa bilong em, na developmen bilong dispela kantri, na dispela kain prodak i helpim investa na man-

meri wantaim.

“Wok bilong dispela kain ol seavings akaun em long promotim na helpim ol manmeri bilong yumi long sevim mani long yusim long bihain taim.

“Mani bilong benk i wok long gro tam ol manmeri i bilip long BSP na putim moa mani go insait long akaun.

“Dispela i mekim ol investa i gat strongpela bilip long benk bilong yumi,” Mista Fleming i tok.

## Digicel gat nupela CEO

Digicel i gat nupela bosman o Sif Eksekutiv Opisa (CEO) na em i Brett Goschen bilong Saut Afrika.

long Afrika.

Em i bin bosim MTN Group, wanpela biknem telekomunikesen kampani



Nupela CEO bilong Digicel PNG, Brett Goschen.

Wok bilong Mista Goschen olsem CEO em long bosim olgeta tripela bisnis yunit long PNG; Digicel Pripeid Konsiuma, Digicel Bisnis na nupela Digicel Midia bisnis (Digicel Play na Loop PNG).

Mista Goschen i bringim i kam planti ekspirens long bosim mobial fon kampani

bilong Saut Afrika.

Mista Goschen i bin stap CEO na CFO (Sif Fainensel Opisa) bilong MTN Group long Saut Afrika, Nigeria na Ghana.

Em i bin wok olsem Menesing Dairekta bilong AltechAutopage Cellular mobial fon kampani.

Mista Goschen bai kisim ples bilong Maurice McCarthy, husat i lusim Digicel bihain long em i bin wok inap 8-pela yia na kamapim planti gutpela samting.

Mista Goschen i wanbel long wok wantaim Digicel long PNG.

“Digicel em i wanpela bikpela mobail fon kampani long PNG na Pasifik, na mi amamas long wok long PNG,” em i tok.

Em i wanbel long pasin bilong ol manmeri long PNG na kain kain kalsa bilong PNG i mekim em na meri bilong em, Kim, i wanbel long stap long Pot Mosbi, na wok wantaim Digicel.

Rijonal CEO bilong DigicelAsia Pacific, Michael Murphy, i tok welkam long Mista Goschen i joinim senia menesmen tim bilong Digicel.

“Ekspirens na save bilong em long mobail fon em i wanpela namba wan samting we mipela i nidim long strongim kastoma bilong Digicel na opim nupela maket,” Mista Murphy i tok.

## APEC bai opim dua bilong bisnis

PRAIM Minista Peter O’Neill i tok bikpela bung bilong APEC bai opim dua bilong kirapim bisnis na pulim moa investa i kam insait long kantri.

Mista O’Neill i tok moa long 7,000 manmeri husat i save wok o bosim sampela bikpela kampani bilong wol bai kam long PNG long dispela bung bilong APEC long 2018.

Em i tok gutpela bilong dispela em olsem ol dispela manmeri husat i kam long dispela bung em ol bikpela bisnis manmer i long kantri bilong ol yet na ol i laik long mekim bisnis long hia tu.

“Dispela ol bisnis manmeri i laik mekim bisnis. Ol i laik inves. Dispela i ken apim ikonomi bilong yumi i go antap na ikonomi bilong kantri i ken gro,” Mista O’Neill i tok.

Em i tok PNG i kisim bikpela sans long holim dispela bung bikos dispela bung bai kirapim planti gut-



Praim Minista Peter O’Neill.

pela samting long kirapim bisnis.

“Moa long 50 pesen bilong ol bikpela kampani bilong wol i mekim bisnis long APEC. Dispela ol kampani i save kontrolim globel tred na invesmen.

“Sampela bilong ol dispela

kampani i laik inves na mekim bisnis tasol ol i no save long kain kantri olsem PNG.

“Dispela bung bilong APEC bai kirapim sans bilong ol long kam insait long PNG, skelim ples bilong mekim bisnis na inves long hia,” Mista O’Neill i tok.

## O’Neill gavman givim luksave long Madang wantaim K235.6 milien

**James G. Kila i raitim**

MADANG provins i kisim gutpela luksave long Nesanel Baset o mani-plen bilong 2017 Tresera, Patrick Pruaitch i putim aut long las wik Tunde.

Aninit long gavman grent Gavman i givim i go long wan wan provins long PNG, Madang provins i kisim 2017 grent o mani sapot long baset wantaim mani mak olsem K235,657 milien.

Long baset pepa provins long kantri we i kisim bikpela grent o gavman sapot em Morobe provins wantaim K274,027 milien, namba tu long en em Autonomos Rijon bilong Bogenvil (AROB) wantaim

K256,567 milien.

Namba tri em Madang wantaim K235,657 milien, namba foa em Isten Hailans provins wantaim K235,418 na namba faiv provins wantaim gavman grent em Is Sepik wantaim K222,272 milien.

Tresera Pruaitch i tokaut olsem ol provins long PNG i kisim bikpela sea o mak long 2017 baset wantaim mani mak olsem K3605.7 milien. Dispela em i 27.8 pesen bilong total baset o mani-plen em i tokaut long en, K12.965.4 bilien.

Em i tokaut olsem ol provins i kisim moa luksave long baset bilong neks yia 2017 em long kamapim rot na bringim kamap gutpela

sevis i go long ol rural komyuniti na distrik na ol i mas yusim gut dispela mani.

Mista Pruaitch i tokaut tu olsem planti ol provins i no bin soim stret sain o mak bilong developmen insait long foapela yia i go pinis wantaim mani Nesanel Gavman i bin givim ol.

Insait long plen bilong gavman sampela ol bikpela projek we bai kamap long Madang long neks yia 2017 em bai wok redi long stretim infrastraksa long wanpela miting bilong APEC samit long Madang, stretim Madang taun rot, na stretim nupela Madang ples balus teminal na mekim longpela bilong Madang ples balus.



Madang taun rot bai lukim bikpela senis long neks yia long redi long APEC miting long provins. Poto: James G. Kila

# Nogat smolkraft ekt long Madang – seveia



James G. Kila i raitim

**MADANG** provinsal gavman na ol politikol lida i mas putim tingting wantaim long kamapim smolkraft ekt o lo long lukautim sefti bilong ol sip na bot insait long solwara bilong provins.

Tude nogat dispela lo i stap na ol sip na liklik bot i wok long mekim samting long laik bilong ol yet.

Ol papa bilong ol sip na bot i wok long larim nating ol bot na sip bilong ol i bagarap i trip nating nating i stap long Madang na Binnen haba long Madang taun.

Wanpela ekspiriens seveia nau i kepten bilong sip bilong wanpela kampani long Madang, Charles Buai, i tokaut olsem nau yet nogat lo i stap long provins we i ken lukluk long sefti na wok ol smolkraft opereta i mekim bikos nogat bodi long provins i gat atoriti long karimaut dispela wok.

Nesenel Maritaim Sefti Atoriti (NMSA) i kamapim pinis Smol Kraft Ekt o lo,

tasol dispela i mas go strong long wan wan maritaim o nambis provins long PNG taim ol yet i kamapim atoriti bilong ol long bihain lo bilong nesanel bodi long lukluk long sefti bilong ol smol kraft o moto bot na sip long provins bilong ol.

Dispela seveia i tokaut olsem Madang provins i nogat lo long provins long banisim ol papa bilong ol liklik bot na tu, ol sip long ran long solwara.

“Is Sepik provins i kamapim pinis smol kraft ekt bilong em long provins, tasol Madang provins nogat. Dispela em no gutpela,” em i tok.

Em i tok tu olsem Madang em i wanpela nambis provins long PNG we i gat planti ples i wok long gat ol moto bot long karim ol pipel i go kam. Olsem na provinsal gavman i mas plen nau long kamapim wanpela bodi long provins long kontrolim lo bilong ol motobot i yusim solwara.

Em i tokaut olsem sam-pela gutpela piksa em olsem planti ol liklik sip nau i pulap i stap long Binnen poin na

tu, long Madang haba we ol papa bilong ol i larim ol i stap nating.

Sapos i gat Madang provinsal smolkraft komiti, ol i ken rausim ol sip i stap nating long haba na tu, ol i ken sasim ol na kisim mani na dispela bai helpim Madang gavman.

Wanpela lokal lida bilong Madang, James Panu i tok Madang na Binnen haba long Madang nau i kamapim olsem matmat bilong ol sip na liklik bot.

“Nau yet Madang haba i kamap olsem matmat bilong planti ol sip na bot i slip nating i stap. Ol bikpela kago sip bilong Luteran Siping (Luship) i slip sore long Binnen haba i stap,” Panu i tok.

“Mipela save lukim na sore tasol, em wok bilong husat tru long rausim ol long solwara bilong Madang?”

“Wankain tu ol sip bilong Boda Developmen Atoriti (BDA) tu i slip nating i stap long Madang haba na i no go aut long mekim wok gavman i tokaut em bai wokim.” Panu i tok.

Solwara man Timothy Liwa i poin long ol liklik sip i bagarap na sindaun pasim ples i stap long Binnen haba long Madang. Foto: James G. Kila

## Planti rot sait maket haus long NCR

James G. Kila i raitim

PLANTI infomel bisnis i wok long kamap long ol sait bilong rot long not kos Madang-Bogia haiwe we i sevim stret ol manmeri ran long PMV na tu, ol papa bilong ol dispela rot sait maket.

Ol dispela ol rotsait maket i wok long sevim ol lain i kirap long moning taim tru na ran long PMV long Ramu, Bogia na ol arapela ples long Midel Ramu i ran i go long PMV go long Madang taun.

Paul Maran, wanpela man bilong ples Warames long boda bilong Midel Ramu na Bogia distrik, i tokim Wantok Niuspepa olsem planti taim manmeri long eria bilong em save

kirap long bikpela moning taim ples i tudak yet na ol i save wetim PMV long go long Madang taun.

Planti taim ol i no save dring ti na kaikai, olsem na taim ol i ran long PMV, ol i save go stop long ol dispela rotsait maket long NCR na baim ol liklik kaikai na strongim bel.

“Ol dispela rotsait maket i save sevim mipela long strongim bel na mipela i save go kamap long taun,” Maran i tok.

Sampela long ol bikpela rotsait maket stat long Bogia na kam olsem long Madang em long Tobenam, i kam olsem long Malala, Ulingan, Mirap, Karkum, Mugil, Bunu, Midiba na

Ol lain husat i wokim ol dispela liklik haus arere long rot i save salim buai, daka simuk na ol arapela samting we i ken stretim laik bilong ol manmeri i ran antap long ol PMV. Moa long en tu sampela ol dispela makethaus i save salim ol petrol na disel long sevim ol PMV na kar i ran long NCR.

Long poto em wanpela liklik fres frut rotsait maket haus long Karkum viles, we papa bilong maket haus, Robert Batalo, i wanpela model fama i save groim popo, fres kumu na ol arapela samting na save salim long ol manmeri. Planti ol lain save baim ol fres popo na ol kumu bilong dispela model fama.



Dispela rotsait maket haus long Karkum viles i save salim ol fres gaden kaikai na frut olsem popo long ol manmeri i ran long NCR long Madang. Foto: James G. Kila



**Air Niugini announces flights to the Federated States of Micronesia**

Commencing 3<sup>rd</sup> December, 2016. Connections available from Nadi, Honiara, Cairns, Brisbane, Sydney, Manila and Singapore.

**Air Niugini** For more information call toll free on **180 3444**

[www.airniugini.com.pg](http://www.airniugini.com.pg)

# GOODMAN FIELDER i salim nupela rais

**GOODMAN Fielder, kampani we i save salim flame plawa nau i gat wanpela nupela kain rais bren i kamap long Papua Niugini.**

Dispela nupela rais i gat nem long Tok Pisin olsem, 'Skel Rais,' na Goodman Fielder kampani i amamas long tokaut long dispela prodak nau bihain long tupela yia wok bilong ol risets na plening na testim prodak. Skel rais i bin kam long Pot Mosbi long Septemba 26 wantaim wanpela namel sais sit rais we ol i planim na pasim long kantri Vietnam bilong salim long PNG maket stret.

"Tingting bilong mipela em long kamapim wanpela kain rais we em i go gut wantaim teis na poket bilong ol pipel bilong PNG stret," Goodman Fielder Jeneral Menesa, Jean-Michel Lejeune i tok.

"Mipela i save olsem Skel em i namba wan kwaliti medium sais sit rais nau i stap long kantri bikos mipela i wokim ol tes long kain kain hap na mipela i lukim olsem em i gutpela yet. Na wantaim nupela

200g valiu-pek sais bilong salim long K1 tasol, mipela i laik tokaut olsem mipela i wokim wanpela rais we ol pipel inap long baim na we inap long olgeta famili i kaikai, maski ol i stap long wanem kain ples," em i tok.

Dispela nupela kain Skel 200g rais peket i kisim nupela nem bilong en, 'wasa rais' long Pot Mosbi we planti tred stua, taka boks na ol maket lain i wok long ran long baim na putim long ol maket tebol bilong ol na salim long K1 tasol.

Skel Medium Grein rais i stap long 10kg, 1kg, 500g na nupela 200 grem mekpas. Skel Midium Grein 200kg mekpas em ol i kolim long 'wasa rais' long ol liklik maket tebol bikos ol i salim long K1 tasol, na 10kg pek i kam wantaim han bilong holim na isi long karim na long yusim bek gen bihain taim rais i pinis. Skel Jasmin Rais na Skel Longpela Grein Rais bai kamap long PNG insait long ol wik i kam. Jasmin na Long Grein kain rais em ol i wokim na pasim long Tailan, long PNG maket stret.

Mekpas bilong skel rais em i strongpela winim ol narapela bren rais long PNG. Em i save holim rais fres yet longpela taim na ol binatang bai i no inap long go insait isi. Skel rais i gat strongpela sel na i no save kamaut taim ol i wasim rais long kukim.

Dispela i mekim olsem bai gutpela gris bilong nutrisen i stap yet long taim ol i kukim na bai mekim ol pipel i helti yet taim ol i kaikai.

Skel rais nau long Pot Mosbi em olgeta holisel stua i wok long salim, tasol Patrick holisel long Gabutu tasol no gat. Ol stua olsem Waterfront, Boroko Foodworld, TST, RH, Bismallah na G-Mart, Kwik Mart, J-Mart na ol narapela ol liklik stua nau i wok long salim dispela rais.

Long ol arapela senta, rolut bilong Midium Grein rais i stat pinis long Lae, Hagen na Goroka long las wik na em i wok long go yet long ol narapela senta long kantri.

Jasmin i wok long go aut nau long Pot Mosbi na bihain bai go long ol narapela hap long kantri.



Willie Grey i salim wasa rais long ol lain i ran long PMV.



Tred stua i soim nupela 200g Skel wasa rais.

## Strongim PNG long save bilong lukautim mani

WANPELA fainensel literesi trening i bin kamap long tripela de long 2000 man na meri bilong Nesanel Kepital Distrik na Sentral Provins na ol i greduet wantaim save bilong ranim na lukautim mani.

Tripela de trening bilong finansel literesi em Laymen's Professional Sevis Ltd i bin ranim. Em i wanpela patna bilong Maikrofainens Ekspensen Projek (MEP) na em i save kisim sapot long

Australia Gavman na Esien Dvelopmen Benk wantaim Benk bilong Papua Niugini o Sentral Benk.

Maikrofainens Ekspensen Program i kamap long traim na pinisim pasin bilong ol pipel i stap rabis o i no gat mani. Ol patna i laik lainim ol pipel long kisim save bilong mani na long ol fainensel sevis we i stap bilong ol Papua Niugini rurel komyuniti inap yusim.

Insait long trening, ol pipel i lainim olsem em i namba wan samting long ol i mas sevim mani na wokim baset long mani na long stap strong long bihainim lukautim mani bilong ol.

"Dispela i min olsem ol lain husat i kisim trening i kisim pawa long lukautim na plenim ol wok bilong mani bilong ol na ol bai inap long lukautim ol famili bilong ol long ol sindaun bilong ol," Australia Hai Komisen Program Menesa Julienne Leka-Maliaki i tok.

"Opim benk akaun, lainim

pasin bilong sevim mani na wokim baset bilong skul fi, helt ekspens na tu long samting liklik bisnis em i sampela bilong ol gutpela samting we i kamap long dispela trening." Mis Leka Maliaki i tok.

Em i tok Papua Niugini na Australia wok Poroman i luksave olsem fainensel edukesen em i impoten long lainim olgeta pipel long ikononomik dvelopmen bilong ol Papua Niugini pipel na Australia em i stap long sapotim ol rurel komyuniti wantaim dispela program.

"Maikrofainens Ekspensen Projek i kisim moa long 135,000 pipel long save long fainensel literesi na moa namba bilong ol em ol meri," Mis Leka Maliaki i tok.

Bikpela tingting i kam long sapot bilong Australia em long Maikrofainens bai lukluk i go long ol hap bilong ol pipel i stap rabis olsem ol meri, long kam insait long kes ikononomi wantaim moa sapot long fainensel inklusen na fainensel literesi long Papua Niugini.



Australia Hai Komisen Program Menesa, Julienne Leka-Maliaki i givim setifiket long wanpela meri husat i kisim fainensel literesi trening.



Ol lain husat i kisim trening long wei bilong lukautim mani o fainensel literesi i sindaun long greduesen de bilong ol.

# Ol kangaroo i daunim ol Kiwi



Winga bilong NSW Blues na Kangaroo, Blake Ferguson i putim trai.

**OL Australian Kangaroo i go het na soim namba wan kala bilong ol yet taim ol i bin daunim ol Nu Silan Kiwi, 14-8, long namba tu raun bilong Foa Nesens tonamen.**

Hapbek bilong ol, Cooper Cronk, i no bin pilai tasol, ol Australia daunim ol na i kisim ples long resis long fainal bilong Foa Nesens bai kamap long Anfield long Novemba 20.

Hapbek bilong ol Kiwi, Shaun Johnson, i ken putim wanpela trai taim tupela minit i stap yet long bungim pinis bilong resis, tasol tupela ekspirians pilaia bilong Australia, Greg Inglis na Darius Boyd, i holim em.

Winga bilong ol Kangaroo,

Blake Ferguson, i bin kisim 'man ov da mets' i bin putim namba wan trai bilong ol Australia long namba 9 minit.

Michael Morgan i bin kisim ples bilong Cronk i bung wantaim Ferguson bihain long 5-pela minit na i salim i go long Jonathan Thurston long putim namba tu trai bilong ol.

Ol Kiwi i bin strong na pilaia bilong ol, Solomon Kata, i bin putim namba wan traimit bilong ol bihain long hap taim long namba 48 minit.

Tasol, Martin Taupau na Tohu Harris, i bin mekim wanpela asua na referi i bin givim penelti egensim ol Kiwi we Johnathan Thurston

i bin kisim tupela poin gen long konvesen kik.

Long namba 61 minit, referi, Ben Cummins, i tok nogat long namba tu trai bilong Ferguson bikos Darius Boyd i salim bal i go pas we referi i tok fowod.

Thurston i kisim narapela penelti kik long 70 minit we ol i skruim skoa bilong ol i go antap long 14-8 bikos tupela konvesen kik bilong ol Nu Silan i no go insait.

Taim 4-pela minit i stap yet, Rapana, i bin putim wanpela trai i opim ai bilong ol Nu Silan, tasol ol Australia i strongim banis bilong ol bihain long dispela trai na ol Kiwi i no kisim sampela moa skoa.

# Kangaroo i malolo pastaim long resis egensim Ingran

KOSA bilong Australia, Mal Meninga, i givim tripela malolo de long ol pilaia bilong em bihain long ol i win yet long Foa Nesens resis.

Taim ol i daunim Nu Silan, 14-8, long Coventry, ol skwat i lusim bes bilong ol, Birmingham, na i go long London long las wik Sande bipo long ol bai resis egensim Ingran long dispela wik long Olimpik Stediam.

Sampela skwat i bin go long Barcelona long malolo long sotpela taim na ol narapela skwat i stap yet long kapitel siti long bung wantaim sampela poro na famili.

Ol skwat i bung gen long trening hap klostu long Twickenham asde we Michael Cheika na ol Wal-



Kosa bilong ol Australian Kangaroo, Mal Meninga, i toktok wantaim ol pilaia bilong em.

laby bilong em i bin yusim long wik antap na i mekim wok redi long pilai egensim ol Ingran.

Sait bilong Wayne Ben-

nett bai i gat sans long kwalifai long go long fainal resis bai kamap long Anfield long Novemba 20 sapos ol i daunim ol Australia.

# Ol Ingran i daunim ol Skotlan

NAMBA wan taim bilong ol Ingran long win long Foa Nesens tonamen bihain long ol i bin daunim ol Skotlan, 38-12, long Richo pilai graun long Coventry.

Ol Skotlan i bin lus, 54-12, egensim ol Australia long Hull long namba wan raun bilong Foa Nesens resis long wik i go pinis. Na nau, tim bilong Wayne Bennett i skruim skoa bilong ol long las 20 minit na daunim ol tu.

Tupela pilaia long Not Kwinlan, Kane Linnett na Lachlan Coote, i bung na putim namba wan trai bilong ol Ingran long namba 6 minit bilong resis taim.

Pastaim winga bilong Gold Coast, Matty Russell, i putim namba tu trai bilong



Elliott Whitehead bilong Ingran i putim wanpela trai long taim bilong Foa Nesens resis i kamap namel long Ingran na Skotlan.

ol Ingran long sait lain.

Ol Skotlan i bin putim tripela trai long namba wan hap bilong resis na wanpela trai long namba tu hap bi-

long resis tasol, olgeta konvesen kik bilong ol i no bin go insait.

Ol Ingran i daunim ol wantaim 26 poin.

# Murray i daunim Isner long tenis resis



Andy Murray i singaun taim em i winim taitel.

ANDY Murray bilong Briten i amamas long em i bin kisim namba wan ples long wol taim em i daunim John Isner bilong Amerika, 6-3, 6-7 (4-7), 6-4 long winim taitel bilong Paris Masters tenis resis long namba wan taim bilong em.

Dispela win i bringim namba 6 ATP taitel bilong Murray na em i skruim namba tu Olimpik na Wimbledon taitel long rot bilong em long go long top bilong lata.

Ol i strongim em long

Mande olsem namba wan man bilong Briten long kisim namba wan posisen inap long ol nupela renking ol i bin tokaut long 1973.

Nau em i lukluk long Wol Tua Fainal bikos em i kamap namba wan long namba wan taim, tasol sapos bipo namba wan, Novak Djokjovic, i winim olgeta resis long ol fainal bai lukim olsem em yet bai kisim bek top renking we em i bin holim insait long 122 wik.

"Long tim bilong mi na famili bilong mi, dispela em

i wanpela bikpela rot long go antap long top bilong renking. Mi bai no inap long mekim gut sapos yupela i no stap. Yupela i bin mekim ol bikpela wok long larim mi resis na ran long wol. Mi bai wok strong long mekim gut yet," Murray i tok.

"Murray i bin mekim gut na mi gat bikpela amamas long em bikos em i winim taitel na go insait long namba wan ples long wol. Dispela em i bikpela mak em i winim," Isner i tok.

# Keitany i winim 3-pela Nu Yok maraton



Mary Keitany i winim Nu Yok maraton na apim plak bilong kantri bilong em, Kenya.

MARY Keitany bilong Kenya i kamap namba wan meri husat i win 3-pela taim long Nu Yok maraton insait long 30 yia.

Keitany i gat 34 krismas i ran inap long tupela aua, 24 minit na 26 seken long kamap namba wan long winim mak.

"Winim tripela taim em i bikpela samting

long mi. Em i no isi, tasol mi winim," Keitany i tok.

Mary Kietany i winim tripela taim, Paula Radcliffe bilong Briten i winim tripela taim na Grete Waitz i winim 5-pela taim. Ol dispela tripela meri tasol i winim Nu Yok maraton taitel moa long tripela taim.



# Ramu NiCo na Fred Hollows Foundation wok bung long sekim ai



Ene Kambao long Fred Hollows Foundation i sekim ai bilong asples Daunagari lain.



Theresa long Fred Hollows Foundation i tokim bosman bilong NCS long KBK Main long strong bilong ai glas.



Michael Kalal long Fred Hollows Foundation i sekimaibilong RamuNiCo wok man long KBK main.

RAMU NiCo Management (MCC) Ltd na wanpela NGO husat save mekim wok long stretim ai bilong ol man nameri, Fred Hollows Foundation New Zealand i bin wok bung wantaim long las mun tasol long glasim na stretim ai bilong ol man na meri long Usino-Bundi distrik long Madang provins.

Oktoba 24 i go 27, 4-pela wok lain bilong Fred Hollows Foundation NZ em Theresa Gende, Sr Clancy Kom, Michael Kalal na Ene Kambao i bin kamap long Kurumbukari Main long Bundi we ol i bin stat long glasim na skelim ai bilong ol wok lain long RamuNiCo Main long Kurumbukari (KBK).

Namel long dispela de, Oktoba 24 i go 27 em ol i sekim ai bilong ol manmeri long KBK Main ples, Enekuwai Rilokesin, Daunagar Rilokesin, Banu asples na Usino mausrot insait long Usino-Bundi distrik.

Total mak long 245 man na meri olgeta i bin kamap long sekim ai bilong ol. Planti man meri husat i bin gat problem long lukim samting gut i bin baim ol nupela glas na ol i ken lukim ol samting long longwe hap o klostu.

Long dispela 245 total man meri, ol i painimaut olsem 34 i gat bikpela birua long ai bilong ol na mas go long operesen long Modilon Eye Clinic. Dispela bai lukim 19 man na 15 meri bai go long operesen.

Michael Kalal husait i wanpela Sumatin tu long sait bilong ai i tok olsem dispela ol kain operesen bai i kamap insait long 5-pela minit tasol wantaim no gat pen na man o meri bai lukluk gut gen na amamas.

RamuNiCo wok bung wantaim Fred Hollows Foundation NZ long sekim ai bilong ol wok manmeri bilong em tasol i luksave olsem ol lain husat i stap arere long KBK Main tu i mas sekim ai bilong ol. Na tu ol lain husat i save wok wantaim ol kontrakta olsem Raibus Sekuriti, Raibus Engineering na ol narapela lain tu i bin gat sans long sekim ai bilong ol.

Long taim bilong sekim ai, ol wok lain bilong Fred Hollows i sekim ai sapos em i gutpela, na givim glas long ol lain husai i gat hevi long lukluk gut na ol lain husat ai bilong ol i bagarap o husat i no inap lukluk gut em ol

kisim nem bilong ol bai go operesen long Madang Eye Klinik.

Long Septemba 30, Fred Hollows woklain i bin sekim ai bilong ol wok lain bilong Ramu NiCo na ol kontraktors long Madang Bes we 55-pela woklain i bin kamap.

Ramu NiCo na Fred Hollows Foundation NZ bai karimaut wankain wok long sekim ai long Basamuk Refinery wok lain na tu ol asples lain husat i stap klostu long Rifaineri. De bilong sekim ai em ol bai tok save bihain taim.

Fred Hollows Foundation em wanpela NGO bilong New Zealand we nau i patna wantaim Modilon haus sik long Madang inap long 10-pela krismas nau stat long 2008 na kamapim wok stretim ai na awenes long ol manmeri mas lukautim gut ai bilong ol na aburusim ol kain kain birua we bai bagarapim ai. Dispela Foundation i bin kamap bihain long wanpela man New Zealand, late Professor Fred Hollows (1929-1993) wanpela dokta bilong ai na i wok strong long tokim ol manmeri long mas lukautim ai bilong ol gut.

Dispela Foundation i bin

skulim na trenim planti manmeri husat i bihainim lek mak bilong Professor Fred Hollows long ol wan wan kantri na asples long skulim na lukautim ai bilong ol man meri.


RamuNiCo i amamas stret long wok bung wantaim Fred Hollows Foundation NZ long givim wanpela sans gen long husat lain i gat ai bagarap i ken lukluk gen na ol lain husat i gutpela ai i mas luksave long lukautim ai bilong ol inap dai i painim ol.



Michael long Fred Hollows Foundation i skelim ai bilong dispela man long Daunagari asples.



Ol mama Usino i bilas kastom na sekim ai long Usino Mausrot.





# Itali i kisim fainal ples long RLWC2017 dro

ITALI i kisim namba 14 na fainal ples long Ragbi Lig Wol Kap 2017 (RLWC2017) tonamen dro, bihain long ol i kamap wina bilong Ragbi Lig Yuropien Federesen kwalifai fainal long las wiken.

Ol Italian Azzurri i daunim ol Rasiem Bears long Leigh, Ingran, long kwalifai namba tu taim long Ragbi Lig Wol Kap. CEO bilong RLWC2017, Andrew Hill, i tok olsem ol i tok orait long Itali taim fainal tim i pinisim RLWC2017 lainap.

“Mi laik tok tenkyu na amamas long Itali long ol i kwalifai long Ragbi Lig Wol Kap resis bai kamap long yia i kam.

“Yuropien fainal i pinis wantaim namba wan kwalifai resis i kamap insait long 18 mun na planti tim i resis

na soim kala bilong ol long ol intenesenel gem.

“Tonamen long 2017 bai lukim ol bikpela ragbi lig pilaia long olgeta hap bilong wol na ol i lukluk long salens strong na winim bikpela Wol Kap.

“Ol sapota i mas soim ol gutpela kala bai ol tiket kwiktai long sapotim ol tim intenesenel iven,” Hill i tok.

RLWC2017 bai kamap long Australia na Nu Silan, wantaim tripela pul resis bai kamap long Papua Niugini long 27 Oktoba i go inap long 2 Desemba, 2017.

Ol 14 kantri ol bai resis em Australia, Ingran, Fiji, Frans, Ireland, Itali, Lebanon, Nu Silan, Papua Niugini, Samoa, Skotlan, Tonga, USA and Wales.

Fainal wina bilong Yuropien



Kwalifaing resis, Itali, bai kisim p-les long Yuropien Kwalifaing 3long Pul D bilong RLWC2017 dro na bai pilai long Cairns, Townsville na Canberra long Australia.

Ol 22 man skwat bilong

Azzurri long Yuropien Kwali-faia i lukim 7-pela pilaia nau i stap wantaim ol tim i stap long Not Kwinlan.

Namba wan resis bilong Itali bai pilai egensim Ireland long Barlow Pak long 29 Ok-

toba, 2017. Ol bai pilai egensim ol USA long Townsville Stediam long 5 Novemba, 2017, na fainal gem long pul resis bai kamap namel long Fiji long Canberra Stediam long 10 Novemba, 2017.

Ol Italian Azzurri i amamas bihain long ol i daunim ol Rasia long Yuropien Ragbi Lig Kwalifaia na ol i go insait long 2017 Ragbi Lig Wol Kap resis.

## Raiders i daunim Sons long Mosbi Sauts resis



Ol pilaia bilong Raiders i sindaun bung wantaim medal bilong ol bihain long ol i win.

SABAMA Raiders i kamapim histori wantaim win bilong ol egensim Sauten Sons long Sir William Skate pilai graun.

Long namba hap bilong Pot Mosbi Saut Ragbi Lig gren fainal resis long Kaugere, tupela tim wantaim i bin pait strong na strongim banis bilong tu-

pela, na tupela i no kisim wanpela skoa, 0-0, inap long ol bungim taim bilong malolo.

Long namba tu hap bilong resis, i lukim olsem ol Raider i bin putim wanpela trai we konvesen kik bilong ol i no go insait na ol i stap pas wantaim 4-0.

Ol Sons i soim stail na kala bilong ol long putim sampela trai, tasol ol Raiders i strongim banis bilong ol yet i go inap long pinis bilong resis.

Ol Raiders i winim fainal resis wantaim 4-pela poin na i kisim tropi na K4,000 kes mani.

## Pukpuks i go long Hong Kong



Ol Pukpuk i trening long kesim bal long taim bilong bowling bal.

OL PNG Pukpuk 15s i lusim kantri long Mande na i go long Hong Kong long resis long Regal Hotels Kap bilong Nesens 2016 long namba wan taim bilong ol.

Tonamen bai stat tumora, Novemba 11, long King's Park Spot Graun. Foapela

tim bai resis em Papua Niugini, Rasia, Zimbabwe na Hong Kong.

Tonamen em ol bai pilai olsem raun ribon wantaim wina bai kamap namba wan tim bihain long namba tri raun bilong resis.

Rasia i difending sem-

pion bilong Kap bilong Nesen we ol i bin winim long yia i go.

PNG bai pilai namba wan resis bilong ol egensim ol asples tim Hong Kong tumora, 11 Novemba we resis bai stat long 7 kilok we 9 kilok apinun long PNG taim.

## Midia Pul i kisim K30,000



Ol eksekutiv bilong Midia Pul resis na maus man bilong Memba bilong Mosbi Not Is i sekhan taim ol i kisim K30, 000 sek.

MIDIA Pul snuka resis i kisim K30, 000 pas long yia presentesen nait bilong ol long Lamana Hotel Bolrum long Sarere nait.

Ol i tok tenkyu long Memba bilong Mosbi Not Is ilektoret, Labi Amaiu, husat i tok promis long yia i go long givim na em i bin givim long las wik.

Martin Kaupa, husat i makim opis bilong memba i givim sek i go long ol eksekutiv bilong Midia Pul resis.

Siaman bilong Midia Pul resis, Tony Sipa, i kisim sek na i tok tenkyu long vais ministar long spot long givim dispela mani.

## Falkonet bilong Nigeria i lusim kantri

OL Falkonet bilong Nigeria i lusim kantri bilong ol long Mande, Novemba 7, long kam long Papua Niugini long 2016 FIFA Anda 20 Wol Kap resis bilong ol meri.

Ol i kam kamap long kantri asde na ol bai statim Wol Kap resis bilong ol egensim Japan long Sande Novemba 13.



Ol Falkonet bilong Nigeria i kam stap long rot long kam long Papua Niugini. Ol i stap insait long Dubai ples balus na i laik kalap long narapela balus.

# Redcliffe i sainim nem bilong Lodge, Kharwin na Tete

MAINA premia bilong Intras Supa Kap, Redcliffe Dolphin, i sainim nem bilong Matthew Lodge, Obed Kharwin na Papua Niugini intenesenel, Thompson Tete, long 2017 rosta bilong ol.

Burleigh i daunim ol long gren fainal long Septemba, Redcliffe i lusim bek rowa bilong ol, Anthony Cherrington, husat i joinim Rabbithos na hap bek, Darren Nicholls, i joinim Penrith Panthers, tasol ol tripela namba wan pilaia i kisim ples bilong tupela.

Inap long 18 mun i go, Lodge i makim Australian Skul boi egensim Nu Silan long Gold Coast tasol i gat

wanpela birua pasin i bin kamap long taim em i bin stap long holid long Nu Yok inap long 12 mun i go em i nupela asua i kamap taim em i no pilai.

Kharwin em i rifuji long Afrika long Ivory Kos na em i gro insait long wanpela pait i bin kamap namel long tupela provins bipo long ol i go long wanlain bilong ol long Guni.

Taim em i winim 8-pela krismas, Kharwin i bin kam long Australia wantaim famili bilong em bikos ol i ranawe long pait. Long Australia, em i stat pilai ragbi lig aninit long Blacktown PCYC Spartans na em i go het na

pilai 30 gem wantaim ol Tiger long Nesenel Yut resis na skoim 37 trai.

Kharwin bai pilai long wing na Tete bai pilai long senta bai mekim Redcliffe long kamap wanpela namba wan tim long 2017 sisen.

Tete i makim Papua Niugini long namba wan taim long pilai egensim ol Fiji long 2015 na nau em i joinim Redcliffe i soim olsem em bai joinim wanpela bilong ol NRL klap.

"Thompson em i intenesenel kwaliti senta pilai husat bai strongim bek lain bilong mipela," Futbol Jenerel Menesa bilong ol Dolphin, Grant Cleal, i tok.



Thompson Tete i joinim ol Redcliffe Dolphin klap long Intras Supa Kap. Em bai pilai long 2017 sisen.

# Ol Lewa i redi long ICC Wol Kap Kwalifaia resis bilong ol meri

SITI Pamas PNG Lewa em i wanpela bilong ol 10-pela tim bai resis long 2017 ICC Wol Kap Kwalifaia resis bilong ol meri bai kamap long Colombo, Sri Lanka long Febrieri 7 i go inap long 21 bilong yia i kam.

Ol Lewa i kwalifai long 2017 ICC Wol Kap Kwalifaia resis bilong ol meri bihain long ol i winim Is Esia Pasifik (EAP) tropi bilong ol meri long Samoa long stat bilong dispela yia.

Tasol, Wol Kap Kwalifaia long Colombo bai lukim daunbilo 4-pela sait bilong ICC sempionsip resis bilong ol meri wantaim Bangladesh, Ireland, Thailand, Skotland, Zimbabwe na Siti Pamas PNG Lewa long go het na resis long 4-pela gem i stap yet long ICC Wol

Kap resis bilong ol meri long Yunaitet Kingdom long Jun.

Kosa bilong ol Lewa, Rodney Maha, i tok olsem ol Lewa bai pilaia egensim sampela ol namba wan kriket pilaia long wol na ol i gat bikpela sans long kwalifai long ICC Kriket Wol Kap resis bilong ol meri long namba wan taim.

Maha i amamas long dispela bikpela sans we em bai strongim ol long kamap namba wan pilaia long wol.

Kosa Maha i tok, "Tim i lukluk long win long Sri Lanka bikos ol pilai hap na wicket em i wankain long feseliti bilong yumi long PNG."

"Mipela bai traim hat long trening mipela yet long olgeta samting we yumi i ken mekim gut long kwalifaia resis," Maha i tok.

PNG Lewa i trening hat insait long ol mun i go na ol i bin kam bek klostu taim bihain long ol i bin go pilai long Adelaide we ol i bin resis long 5-pela 50 ova na T20 resis egensim SACA XI.

Ol 10-pela tim bai resis long Colombo bai bruk namel long tupela grup. Top 3 long wan wan grup bai go insait long Supa Sik Stej na kisim ples long Wan De Intenesenel (ODI) wei inap long narapela ICC Wol Kap Kwalifaia resis bilong ol meri.

Ol top 4 tim bilong Supa Siks bai kwalifai long ICC Wol Kap 2017 resis bilong ol meri na tu, ol bai kwalifai long narapela ICC Sempionsip bilong ol meri. Na tupela top 2 tim bai resis long gren fainal long Febrieri 21.

# Barra i lus long ODI resis



Ol Hebou PNG Barramundi i redi long pilai fainal ODI resis i bin kamap long Tunde.

HONG Kong i daunim ol Hebou PNG Barramundi wantaim 7-pela wicket na winim Wan De Intenesenel (OID) resis.

Kepten bilong ol Hong Kong, Babar Hayat, i helpim long pasim dispela win wantaim 7-pela wicket egensim ol PNG we ren i pundaun na bagarapim ol ODI resis i kamap long Tunde.

Ol Barras i pilai gut na

putim mak long 244 we Sese Bau na ekspiriens pilaia Mahuru Dai i putim.

Long taim ol i ran, Hong Kong i stap long 3/170 long namba 33 ova taim ol heven i op.

Bikpela ren i pundaun inap long wanpela aua i larim ol i pilai wantaim Dakwot Lewis metod.

Nupela mak bilong ol Hong Kong em ol i bin

yusim long 178 insait long 38 ova we ol i bin winim mak isi we Hayat i paitim wining ran.

Tasol, long namba tu gem bilong ODI resis i lukim olsem kepten bilong Hebou PNG Barramundi i daunim ol Hong Kong wantaim 14 ran na kepten bilong Barras, Assad Vala, i kolim dispela win olsem bikpela win bilong tim.

# Tim PNG i tok gutbai long Jastis Davani



Jastis Catherine Davani i toktok long namba 17 Nu Silan Lo Faundesen long 2013.

PAPUA Niugini Olimpik Komiti (PNGOC), Papua Niugini Komonwel Gems Asosiesen na Papua Niugini Pasifik Gems Asosiesen wantaim Tim PNG i makim maus bilong olgeta nesanel federesen na ol sapota long wol, na i tok sori long dai bilong Jastis Catherine Anne Davani, CSM.

"Mipela i salim tok sori bilong mipela i kam long man bilong Catherine, John, ol pikinini man bilong em Rignald, Peter, Cecil, na Alexander, na ol famili na wan lain bilong em long dispela taim nogut. Mipela i sanap bung wantaim ol long prea," Presiden bilong PNGOC, Sir John Dawanincura, i tok.

Tim PNG i tok gutbai long Jastis Davani husat i gat nem long spot na wok bilong em.

Davani i stap Vais Presiden bilong Papua Niugini Futbol Asosiesen long 1993 i go inap long 1995, bod memba bilong Papua Niugini Spot Komisin, nau ol i kolim PNG Spot Faundesen, long 1995 i go inap long 1996 na bod memba bilong Papua Niugini Spot Federeesen, nau ol i kolim Papua Niugini Olimpik Komiti, long 1993 i go inap long 2001.

Long 1989 i go inap long 2004, Davani i bin stap Eksekutiv Memba bilong Papua Niugini Futbol Asosiesen. Na tu, em i namba wan memba bilong PNG Spot Disput Traibunal, na nau em i bin stap Siameri na i bin dai.

Jastis Davani em i amamas etlit. Em i makim Papua Niugini moa long tripela Os-

enia Futbol Konfederesen Wol Kap kwalifaia na em i stap kepten bilong PNG long 1994 na 1998 tonamen.

Davani i bin makim Papua Niugini long 6-pela intenesenel resis. Na tu, em i stap Deputi Tim Menesa long Tim PNG Jenerel Menesmen long 1995.

Jastis Davani long 2001 i kamap namba wan Papua Niugini meri long stap long Semba bilong Intenesenel Abitresen bilong Futbol.

Bihain, semba i bung wantaim Kot bilong Abitresen bilong Spot na i makim PNG yet inap long em i dai.

Em i stap long Edok Spot Traibunal bilong 2014 Esien Gems long Incheon na klostu taim long 2016 Olimpik Gems long Rio de Janeiro.



Junia swima bilong Boroko Swimming Klap i redi long kalap long pool.



Rexford i mekim bataflai swim long sempionsip resis bilong Boroko Swimming Klap.



Ol swima i malolo long liklik swimming pul.



Netbal eksen bilong Praivet Kampani long Rita Flynn kot.




AFL eksen long Bava Park namel long Kokofas na Koboni.



Tim Spain kamap long ples balus.



Tim Sweden kamap long ples balus.



WHITE TUNA FLAKES  
**DIANA White**

WHITE TUNA  
insait  
**K 2.20**



Manufactured by:  
RD Tuna Canners Ltd.



Tasty and Flavourful White Tuna for Everyone!

## Fainal 4-pela tim bai kam long PNG tude

OL fainal 4-pela tim bilong 2016 FIFA Anda 20 Wol Kap resis bilong ol meri husat bai kam krugutim Papua Niugini tude em Tim Ganah, Meksiko, Nu Silan na USA.

Nigeria, Kanada, Frans, Japan, na Jemani i kam kamap long kantri asde, na Spain, Korea DPR na Sweden i bin kam kamap long Tunde.

Tim Brasil, Korea Ripablik na PNG i kam long las wik Sande na Venesuela em i namba wan tim husat i kam long kantri long las wik Fonde, Novemba 3.

Ol tim bai opim 2016 FIFA Anda 20 Wol Kap resis bilong ol meri long Sande, Novemba 13, em Sweden na Korea DPR i stap aninit long Grup A bai pilai long Sir John Guise Stediam.

Tim Papua Niugini na Brazil i stap aninit long Grup A tu bai pilai long wankain taim long wankain pilai graun.

Spain bai egensim Canada long Sande, 13 Novemba, long Pot Mosbi Bava Park na Japan bai salensim Nigeria. Ol dispela 4-pela tim husat bai pilai long Sande long Bava Park em ol i stap aninit long Grup B.

Long Novemba 14 bai 4-pela

resis i kamap we tupela gem bai kamap long PNG Futbol Stediam em ol tim husat i stap aninit long Grup C. Dispela resis bai kamap namel long Frans na USA, na Ghana na Nu Silan.

Ol tim i stap aninit long Grup D em Jemani bai pilai egensim Venesuela na Meksiko bai salensim Korea Ripablik long Nesanel Futbol Stediam.

Olgeta tim bai malolo long Tunde, 15 Novemba, na long 16 Novemba em ol Grup A tim bai pilai raun robin gem long Sir John Guise Stediam na ol Grup B tim bai pilai raun robin gem long Bava Park.

Wankain samting bai kamap long ol tim i stap aninit long Grup C we ol bai pilai long PNG Futbol Stediam na ol tim long Grup D bai pilai long Nesanel Futbol Stediam long Novemba 17.

Ol grup resis em ol bai pilai i go inap long Novemba 21 na ol bai statim ol kwata fainal resis long Novemba 24 i go inap long Novemba 25.

Semi fainal bilong 2016 FIFA Anda 20 Wol Kap resis bilong ol meri bai kamap long Novemba 29 na Gren fainal bai kamap long Desemba 3.



Tim Jemani i kamap long Jacksons ples balus long Tunde. Ol bai opim 2016 FIFA Anda 20 Wol Kap resis bilong ol meri na pilai egensim ol Canada long Sande, Novemba 13, long Bava Park pilai graun long Pot Mosbi.



# Be CONFIDENT!

With Laurier Feminine Sanitary Products

Good Products, Better Prices, ikam long

## Johnstons Pharmacies Ltd

P.O.Box 1066, Boroko, Papua New Guinea.  
Tel +675 325 3185 Fax +675 325 0190 Email sales@johnstons.com.pg